



校官

書豐縣訓導趙君事

陸繼輅

趙君鍾書字守田武進人官徐州豐縣訓導嘉慶十八年林清之亂其黨馬朝棟等起曹州既戕曹令姚國旆旋掠定陶定陶令賀德瀚戰死城武單豐大震君時在府聞警即日馳歸豐呼門而入豐令張琮執君手而歎曰君獨身在官寇且至適奉檄他往幸也乃肯來就死地於是同官咸感奮誓盡力擊賊賊聞有備不果至二十一年秩滿引見奉旨以知縣用凡待次五年卒年六十有一子仁基有文行與余善

陸繼輅曰吾家與趙氏交四世矣趙君訥訥然言嘗不能達意又素不習騎及激於忠憤乃能縱馬絕馳一日行百五十里使所遭不幸與張巡還守睢陽何以異孟子有言志氣之帥也氣體之充也於虜豈不信哉

寶應縣訓導張君墓志銘

姚椿

子弟樅初官寶應教諭書來言訓導張君之賢篤學厲行嶮然自置不

續碑傳集卷四十六

以其官之卑家之貧洪忍啞啞如世俗陋儒為者予慨然為之歎息其後數游寶應與君益相習所言論益廣去年春再至則君病瘖不能語遂告歸送之黯然而冬而其孤汝緘以訃聞又介予弟以君門人劉寶楠所為狀徵銘序曰君名鼎字愛吾一字趙亭世為霍邱西鄉人父玉簡有孝友行君中式乾隆五十四年江南舉人嘉慶十三年大挑知縣請改校官其主試師責之弗應明年注選寶應訓導初至時崇聖祠及名宦鄉賢祠或廢或蕪士或弗克率教君整厲嚴栗約繩譽諄噓植善良澤之以和於是諸祠咸舉而邑之滅陳二烈士祠李公深祠亦以葺事實應城河躍龍橋首受運河尾達東湖十八年石壞水夜溢入城居民謀懼語侵河官明日河兵指捕謹譟者繫諸生吳溢駒等事上制府慇懃鞠逮繫經年君見上官則曰謹譟者民也非士也見諸生則曰上官知汝等無罪行汝汝先是康熙時諸生忤縣令鍛鍊成獄黜者二十人株守者十三人皆極考掠至是獄興勢嚴急諸生惴惴不自保然竟得釋寶應地保挾早隸為姦欺諸生苗之鉅叔父家設書肆地保脅持索錢之鉅爭之輒袒臂以行日第隨如縣諸生徐宗禮家設小肆縣役以惡錢質物不受則詈之宗禮逃追而詈其後諸生成莖役以抗糧誣

逮至縣三人者素善士君奮起曰

朝廷設官以教士然使士辱而官不知殆非

國家養士心力爭於縣官強爲鞭役保械而徇諸市君於諸生無藉者未嘗有所顧愛士不敢倚君以傲法前大學士松筠公總督兩江勘災寶應出俸金一千兩委君及倅貳振災民倅貳乾沒大半強同報君曰苟言盡給給松公也言半給則是劾同官以自暴其廉遂以疾謝君生平好談論不避豪富權貴胸中無柴棘城府坦坦如也能自約苦以勤其官沒而有思可謂敦篤好義之君子君娶薛氏黃氏子五汝網汝紀汝維汝綽汝緘孫某某卒於道光四年十月某日年六十三歲其孤等將以某年月日葬於某某之原銘曰

古者一命克盡其官今之爲人彼飢匪寒矯矯張公弗懦弗激循其質性用表直節人所暱就君勇避之人所難爲君曲濟之母言祿微毋言家擾士慶於庠民慶於道豈無貴人口言利民迹其所爲惟私是循愷悌之衷樸茂之實是宜康彊以臻耄耄胡天不弔中壽遽衰白田有歌士林永思霍山嶷嶷潁水瀾瀾我銘斯版庶筆無泚

程學博傳

潘詒

續碑傳卷四十六

二

丙戌歲子失歸安姚職方因得疾有孝廉訪子而以予疾阻者快快去座客言其人衣食居處僅不絕人事傭書逆旅或不給則終日讀書人知其飢莫敢饋或請爲子弟師必辭慨今師弟以技相鬻不欲以口腹辱古人道蓋狷如職方者也予聞亦怏怏惜之後病兀兀忘其名少聞聞其以謄錄館敘爲學博江左亦不悉其地遇士大夫志學問者恆道之數載聞浙有兩學博廉毅可畏一至臥無被其子至與二百錢使躡屨歸然生質實安爲之故接物温厚常可就予意前孝廉必一也又數載司徒姚公過江左曰吾真得嚴君平矣彼誰爲安在乎予不能舉快快罷戊戌春浙士就試禮聞多集吾廬知其人曰此桐鄉教諭山陰程澹人名希濂者也歿二年矣士人思之欲爲廟一則東陽盧鳴陽名標爲臨海教諭狷如之亦子至與一筐蔬使負而返年八十餘聞已歸存亡未可知殆胥失之矣

潘諒曰罔似狂室似狷二者皆不偶俗然不可與於學問居俗習之中通理明本務而不以外物累其內者雖所守過中而士習維繫於是乎在士無守不可與語學問狷善守約其進取不及狂簡而蹈規矩亦易於狂簡世無聖人裁就則狷之質尤循循寡累故吾於姚職方有深惜

焉俗入於習必有毗一方所行必有不甘自汨者示儉示禮在審所尚而有以表式之今東陽之俗吾不知若吾越百年以來如程學博者又曷可少哉

夏先生傳子冊 方宗誠

夏先生諱鑾字德音號朗齋太平當塗人父沛霖太平府學生以質行聞先生生十月而孤母李氏賢守節教養幼穎悟好學年二十三補縣學生旋食餼嘉慶丙辰

詔舉孝廉方正時大興朱文正公巡撫安徽以先生學行應

詔固辭不獲受六品服戊午科復以優行貢成均已未考取入旗教習辛酉補正藍旗教習先生性篤孝不忍一日離母教習三年夢寐間常號泣以期滿引

見用知縣請改教職歸養甲子選授徽州府學訓導迎養數年遽告終養旋里方請改教職時朱文正公亟止之不可謂人曰真孝子也及告終養士林攀留不得新安老儒程易疇先生偁歎曰凡師之教以孝爲先夏先生一去士皆興起於孝身雖去教愈光也其迎養郡學時嘗中夜爲母煮粥火燎其鬚諸生傳爲美談庚午居母憂喪葬一秉禮經服

續碑傳卷四十六

三

闕再補原缺先後在徽十有餘年先生之學凡三變少攻辭章後乃專意治經然不事著述務篤行五十歲後專嗜程朱之書語默動靜造次必於儒者論近世學脈以陸清獻公爲得朱子正傳其餘雖湯文正篤實李二曲之苦節皆未脫姚江藩籬訓士子必以篤信朱子躬行小學爲宗毛西河袁子才諸書尤深戒子弟勿畜其學之正大如此先生爲人務培植經明行修之士績溪胡竹邨培輩爲諸生時精研儀禮先生雅重之勸從名師講授故胡氏儀禮之學以成歛江晉三有誥好音學先生示以顧氏五書遂通古韻以音學名家前後所舉優行如歛汪萊程厚黜汪春臺葵源戴揚休王士杰皆學行端粹著述有傳於後又嘗屬葵源舉人江慎修先生崇祀鄉賢爲後進法彙朱子示子帖童蒙須知陳文恭公五種遺規節要以貽學徒徽州修府志手定體例於節孝尤盡心校讐誨士極嚴有屈辱必爲言於上官嘗謂士習不磨礪則駁而不純將成風俗之憂士氣不培養則屈而不伸無以爲四民之望人以爲名言尤以仁讓儉約爲士子倡郡故有兩紫陽書院日久廢弛爲經理得復充裕學宮圯敗捐學租定爲歲修之資嚴冬不忍獨衣裘倡捐縣衣給貧者久之得二千金遂爲永利歲早籌千金歸拯戚里而

家食止於充飢先生好施與於宗族尤厚婚嫁喪葬必成其事無業者給田與耕俾不爲非倡捐義田義倉積穀育嬰皆變通古法以籌久遠嘗曰嗇於己謂儉嗇於人謂刻儉固美德然豈可流於刻哉其居鄉也謂讓之一字可終身行處人骨肉閒委曲調護遇大事不隨俗委蛇每曰鄉原最害事也郡守延修儒學鴻工它材不二年而成節其餘勸建考棚及三忠八蜡等祠且存千金爲歲修資得久無圯早歲勸行挽潮溉田法人倣之至今獲其利生平所爲善行甚眾喪其先業不悔亦不以告人嘗言興利除弊不盡屬之長官先生與有責焉惟公與誠庶克濟耳又言論語以約失之者鮮非僅儉約之謂也約於取名則無粉飾之習而所務者皆實行約於取利則無豐腆之望而所得者皆義取交游約可無奔競之風讀書約可無浮濫之失故先生處族黨則能以德意化其族人數十家無爭者處鄉則化行於鄉數十年無訟獄亦無藉樗之戲爲學官薰其德而善良者尤多先生既沒徽人士請入名宦祠越四年當塗人士復請祠鄉賢入祠之日會者數百人先生生於乾隆庚辰卒於道光己丑年七十歲子四人折道光乙酉舉人仕終婺源教諭炯廩監生考選州吏目煥增貢生變道光辛巳舉人江西知縣皆有

學行惟炯先卒

續碑傳卷四十六

四

炯字仲子一字卯生少承父學兄弟互相師友體弱而好書雖病必置書枕畔初嗜

國朝閩顧江戴諸家之學長治諸經注疏旁及六書音韻謂聖賢大經大法具載於禮著禮志一書窮源竟委艸朔未定遭父喪乃體劬宋元明以來諸大儒之言嘗謂朱子之學由博反約尊德性道問學未嘗偏得明體達用之全自明儒開心學之宗其弊始至於荒經蔑古由是自宋元以迄近代諸家之書無不發其旨趣辨其誣謬粹然一軌於程朱之正又言天下之理雖具於人人之心而不證以古人之所得則仍然一人之心非百世同然之心也諸經文義與衍不攷漢人之訓詁何以悉其名物制度不究宋儒之義理何以知其廣大精微且治亂盛衰不攷之通鑑何以知歷代之興廢政治之得失人物之臧否經史爲羣籍之精華近思錄爲經史之權度是故程朱之教也孔孟之教也卽堯舜三代以來羣聖相傳之教也又曰宋儒非不研經但必反諸身心性命學問始有歸宿又曰窮經以致用也用之於家則自收束身心整齊內外人情物理知明處當事皆有實際用之於國則自農桑水利風俗

學校以及奉公守法潔己愛民事事皆有實心如是而後可爲通儒而後可以謂之學者其言切於時弊關於世教多此類炯事親孝兄弟友愛治家宗陸梭山正本制用篇張文端恆產瑣言謂治生之法惟儉可以明志讀書謹干謁居官絕苞苴皆由此始嘗志爲經世之學著選法河事磋商私議諸篇論者以爲多可見諸施行又言督撫學使風化之本苟能講明正學登高而呼則世道人心學術必蒸蒸焉隆古之治可復矣然困於諸生無所試嘗一應舉順天不售道光壬午考職得二等授州吏目遂歸養親專力於學丙午卒年五十二有夏仲子集行於世論曰周官云儒以道得民今之學官溺厥職矣其殆荀子所謂賤儒者乎及觀夏先生之爲師行爲世表學成家法生推爲儒宗沒則俎豆而尸祝之又何其與古之以道得民者無以殊也余與先生伯子毀甫先生交讀其書因得悉先生之行與仲子之善承家學因著此以爲後世法焉

湯溪縣學教諭沈君行狀 幾泰古

道光二十一年湯溪縣教諭嘉興沈君紱齋謁告將歸湯溪人重君學行爭挽留主講九峰書院君去湯溪亦無以爲家不得已應其請乃增

續碑傳卷四十六

五

設規條於制義外課經解策論詩賦且爲講經及小學書君嘗主泰州書院亦若此其勞無異爲校官時數年以疾卒道光二十五年正月九日也年六十有五其年五月次子敷桂以縣學生祝光烈所爲事略及君所刻勸設祠倉議減釀備荒說施衣集存信錄湯溪縣節婦譜孝子譜示泰吉於杭州屬爲家狀祝生敘述翔實君所設施皆可師法乃不敢以不文辭謹詮次之曰君諱寶麟字孔珍紱齋其自號也曾祖諱近仁江蘇儀徵開官濬河必避民墓人咸德之祖諱增爲錢塘桑叟甫先生高第弟子乾隆甲子中式舉人中乙丑會試明通榜甘肅崇信縣知縣考諱振鵬乾隆庚子進士直隸豐潤縣知縣兩世皆有惠政豐潤君生子二君其長也年十八舉嘉慶戊午順天鄉試道光丙戌大挑一等改就教職其同志友金衍宗岱峰語泰吉曰紱齋累世循吏其人精勤亦有治縣才乃辭避不爲與我同何也然爲校官必若紱齋者始稱職爾戊子選授湯溪是時我從兄械雲壽爲武義縣教諭平湖方坰子春佐之兩人皆持躬謹教士勤於是金華士論僉謂錢方沈爲嘉興三夫子云我兄及子春皆遜謝曰紱齋非可幾也君初至湯溪卽修灑掃殿庭無積塵雨則周省視有漏痕則旁皇若無所措曰我室完而廟屋敞

漏我何衣食於此繕完乃卽安邑人聞之皆感奮相率新兩廡及名宦鄉賢忠孝節義四祠並及先農神祇壇君倡之也尊經閣藏書殘闕者借鈔購補多精整撰文廟祀事考上稽

大清通禮諸書以正湯溪沿習之誤兩廡位次及釋奠儀節器數考定惟謹前期必變食及祭必潔心甚其辭職也自謂精力衰恐跪起或失儀爲大不敬云君治己甚嚴接人甚和待士甚恕當官理案牘纖微皆稽例有問者輒縷舉曲折無遺例所不可者以義斷之眾莫能奪武生葉某爲富家訟審其狂釋不問富家控之府檄縣移學視葉某矜君請集兩造讞之縣不可府又檄如初同僚曰拂知府意且得罪君曰忤知府不過奪我官我終不以一官故枉人罪府縣凡七檄而葉某卒不禩廩生某病狂其父得錢於待廩者爲某請給衣頂君廉知之執不可曰爾子疾愈必悔之固請叱之曰利乃能移人父子情乎我必不可無何某疾瘳其父亦悔悟縣賦地丁銀民舊折錢以納有定數會銀直昂縣將增納民錢君勸止之其長泰州書院時知州議增院租以裕土止之不可則曰書院者將教士以學道愛人爲他日臨民用可先示以剝民自裕乎必欲增吾請去議乃罷君生平辨別義利侃侃不苟同類如此

續傳卷四十六

六

乙未夏大旱奉檄勸分人皆曰沈夫子至吾邑八年口不言錢今者爲一邑民命計吾儕可不力由是樂輸者眾凡飢民之簿籍錢粟之斂發期日之疏數縣尹屬君總其成鈎覈籌畫民困得蘇而君自禱雨至施振憂勞幾半載遂得嗽上氣疾鬚髮斑斑矣有益於民生者猶力疾勸行不少怠邑士益信從之勸設祠倉議諸書皆次第行之而有效者也其書已刊行君敘例極詳故不具往歲癸未浙西大水自泰州急歸省父墓著省墓日記述所見水利廢壞及野殯漂流有足爲世鑒者外舅崔公分巡河南南汝光道時爲撰南汝光水利志十卷蓋自其少時卽究心郡國利弊期有濟於世行之湯溪者一二端爾所蘊未盡展而湯溪人已厚被其惠稱頌之不衰祝生述其父言爲諸生六十年所事學師甚眾未有若沈夫子者卽縣志列明以來官師數十人不過一二人若夫子耳其言良信然君晚歲讀儒先書自治益力每歎曰吾自省生平內疚實多也所爲詩古文詞必期實踐不苟爲高論嘗研究荀爽易爲圖記未竟藏於家娶山西崔氏乾隆甲辰進士河南南汝光道景儀女中歲以疾盲相敬數十年子三對薇敷桂應梅皆庠生弟慶齡力學早世應梅爲之後

孫劭吾先生家傳 吳敬勳

先生孫氏諱葆恬字劭吾善化人祖諱繩武歲貢生考諱先振直隸撫甯隆平知縣本生考諱先捷縣學生先生之本生府君年且五十一矣兄無子以後其宗兄卒遺財產以與族人先生既單子稍長自力學以文名舉嘉慶二十四年鄉試屢會試不第爲桃源縣教諭學官爲虛職久矣官以教爲名士莫從於學而爲是官者其人率鈍傲無進取益偷不自好尤不肖者至趨走假息縣令賤辱過丞尉蓋少有賢可稱道者先生之教桃源更數令皆以名行加敬禮人莫敢以其得於令一干以私令有以事罰富人錢二十萬置之學宮陰欲以相資則召諸生使籍掌之而常慮求其職所以爲教既進生之才者勤與講學藝尤惜其棄者蒯生者才無行將黜於學使痛責之令自悔改爲言而免程生貧無家夜止學宮旁日狂飲市中試之文能卽置齋中親督之學已而逸去每歎曰程生負我諸生數十人訟錢糧上官碑於縣門令怒將盡遠治之先生召而數之曰學生干公事大戾也於國有法又益怒令君無禮且爲此者始緣民情挾胥役姦稍且自蝕其中諸生何爲者命亟毀碑令亦遂已居桃源九年卓薦當謁選知縣以親老不行憂歸未幾卒

續碑傳卷四十六

七

鄞縣沈道寬栗仲以名進士令桃源尤善先生稱其才達於吏治而惜其不施也子鼎臣翰林院侍讀頤臣兵部主事觀臣舉人先生累

贈中憲大夫

吳敏樹曰侍讀與余其喜爲古文辭屬余爲中憲先生傳他行不悉著著其爲學官事敏樹嘗一爲是官慙負念有以爲退計卽自免去先生乃以貧養仕其志意傲然不誣豈易耶凡官者惟其職之難也然以時敝流失而誣於其名者獨是官也與哉

候選訓導連君墓志銘 俞鑑

濱東南皆海也而吾浙海濤異他處衍溢漂疾易爲患朝廷歲糜金錢以巨萬計築塘捍之海水猶或齧入蕩田廬凌岡壟然則塘工尤要哉余於咸豐末避地上虞之查浦其地負海而前臨曹娥江土人謂之前江後海前後皆有塘塘工險要爲浙東最父老每爲余言樂川連君從事於江海兩塘者十餘年吾儕至今安全者連君之力也余固已知君之爲人至光緒二年君之孤以君事略乞銘其墓則君已古人矣按事略君諱仲愚連川其字也上虞人曾祖熊飛祖彭年四川忠州直隸州知州父聲佩候選通判君自幼爲忠州公所奇撫其背曰可兒可兒異

日興我家者此子也及應童子試冠其曹然君不屑爲科舉之學友於兄弟厚於本支信於朋友其器識之宏學養之深言行之篤實材幹之優裕事略所載未得其十一余無以言也舉其一瑣事云兒時偶大嘯鄰人趙叟抱至瓜田摘一瓜子之乃喜爲之笑六十年後追念此事買田二畝與其孫爲趙叟祭田卽此一事可見君之爲人矣君生平落落大者在前江後海兩塘上虞之西鄉曹江在焉其上爲新昌嵯縣萬山重疊眾流奔赴下接大海潮汐洶涌而乾隆以後外來流民盜種山場每逢大雨山中泥沙隨流而下溪河先淤而江身亦日以高江高雨水大水大而塘危道光三十年秋八月霖雨連日風潮大作決大口十有七布政使汪公臨視借庫銀三千兩命知縣張公致高修築之張公以屬君君寢食於工次者一年有餘而十七決口皆合咸豐三年海水逼塘下護沙不盈十丈而江塘適又決大口三權知縣事林公鈞議築決口及修前後塘又以屬君君自是奔走於前江後海無暇日矣君以爲善治病者必治病之所自來善用兵者必不使敵臨城下於是創修臨江大牆之舉牆成凡三千六百丈而其內土塘有重關之固於是首險次要各工乃得次第經理而賀家步柴塘厥工尤鉅先是塘之最險

者曰孫家渡爲江海互激之區其後因孫渡嚴守無可乘乃移而衝突賀家步海潮西上江水東下激而怒起高過於塘塘內一河之隔皆民居也地形局促不能加廣卽無可增高君乃議築柴塘八十餘丈以分水勢至今賴之然君之言曰水勢遷移不定則隄工夷險無常安知今日之次要非異日之首險孫家渡賀家步其明徵也而後海石塘歷年旣久日就傾圮數百里民命全係於此每至塘上輒徘徊不能去同邑有邵培福者感君高義創設管塘會君甚嘉焉命其會曰眾擊捐田四十畝入會中鄉里慕義者咸附之先後得田二百餘畝歲入其租以供修築之費君以孫家渡爲全塘扼要之地卽於其地建別業一區藏度書籍雜蒔花木顏其堂曰留耕山房平時養老於此有事卽爲公所其中有捍海樓憑欄而望則江海形勢皆在目中君雖老且病猶可於此中臥而治之孰意樓成而君旋卒也君卒於某年月日年七十歲上虞縣學生候選訓導加光祿寺典簿銜配某氏生丈夫子六人茹副貢生候選內閣中書芳候選州同萼藻荇俱國學生蘅優廩生孫十一人入邑庠者三人曾孫一人君所自著有塘工紀略四卷都凡海塘四千七百六丈江塘六千六百二十六丈皆君手所規畫故言之甚詳余刺取

其事銘君墓又附敬睦堂條規則以贍族黨鄰里之貧者連氏子孫所宜世守者也銘曰

庚辛之際道路荆榛君運於海以食飢民大亂初定百度一新凡百有為惟君是詢功在糞舍利及民田君所措意尤在海濱經之營之垂二十年前江後海無役不親徼君之力民其介鱗何以報之視彼後人

穎上教諭曹君墓志銘

徐子芬

池州銅陵縣有力學篤行之士曰曹君琢之効數年矣既歸厝其弟耕之率其孤以狀乞銘先是咸豐四年余里人王君福永以穎上教官閣門罵賊死又一年聞穎上縣城穎一教官以存教官者銅陵曹君琢之比來安慶與其弟耕之游耕之為人循循有法度數道君之行誼君中道光丁酉科舉人咸豐五年選穎上縣教諭教官俸恆薄而君固囊異時凡為教官者恆多方以自埒於府若縣歲恆厲其生徒括金錢以為壽故府若縣視教官如門下客而生徒之於教官恆相迕而不相親君之初至穎上也生徒循例請壽君正色謝曰此何時而迕為壽耶且僕雖窶終不以壽溷諸君為於是嚴立條戒暇輒白於縣官請浚河築壘部署鄉兵豫以待變卒不用其明年盜圍穎上城中兵二百人君召

續碑傳卷四十六

九

生徒合鄉兵助守遇事力爭縣官卒感其誠多信從之頃之盜穴城城崩君督眾擊賊戰屢捷而是時城外援久斷吏胥庭辱諸生諸生謹誓眾請鬪君曉之曰盜隔一牆內鬪而召寇兵非便也且吏胥何較耶或有諷之去者君笑謝之蓋君助守以及解嚴總四十有九日既敘功得六品銜以知縣用其明年赴試入都歸道解州路梗遂授經於解州尋芻得年四十有八同治二年六月歸厝於祖塋之次君世居銅陵東鄉耆老潤曾祖醇太學生妣胡祖奎縣學生妣徐嘗封肉以愈姑疾世所稱銅陵徐孝婦也考觀輝廩膳生妣盛繼妣陳君少承家業讀書務實踐其學守陽明致良知之說昔朱子論學校推本於教官而深病夫懷牒求試其選益輕故土之自待益薄嗚呼若君之行事與吾鄉王君之死要皆能不自負其官者與君諱藍田配章孺人子二長榮黼早世次榮綬縣學生一女適石埭貢生陳蔚文君同母弟耕之名翰田道光庚子科舉人耕之將刊行君所著書曰經義解曰史論曰大學古本解總若干卷余又以歎王君之死幾斬焉而無聞也悲夫迺為銘曰

士矧於俗俎豆虛設嗟哉賢宮鐸隕其舌嶽嶽曹君其風可儀壽不償德天靳其施君有賢昆令聞以崇考行撰銘昭示無窮

戴教諭事 曹藍田

太和縣治居沙河之北與蒙亳巨捻相鄰城被攻圍者數矣然卒不破
鄉村雖閒被蹂躪然旋復其舊則教諭戴鐵夫之力居多鐵夫名漢翔
泗州人也以舉人任太和教諭有年言坊行表士林悅服咸豐三年春
長髮由正陽關破穎上蒙城二縣太和震動時鐵夫請其縣令林君速
整飭鄉城團練為守禦計林君難之鐵夫則召集紳士商民諭以大義
禍福並條列事宜相示皆踊躍聽從鐵夫遂為團練長林君深倚焉後
令侯君至舉依其法無稍易其法縣分四鄉各鄉分小團數十以大團
領之合縣得大團領以城內總團領之外則與河南諸縣相聯絡互為
犄角之勢故穎郡六屬蒙亳穎霍皆殘破雖阜陽亦僅存其半而太和
獨完八年春大府始以其功入奏鐵夫得

旨賞戴藍翎加五品銜侯君擢直隸州知州

賞戴花翎諸同寅亦俱進秩有差初侯君以鐵夫次子承怨歷年襄辦
有功欲列名請於大府鐵夫不可吁此其所以能成保障之功歟鐵夫
既督辦團練斂費非一次民頗有怨者或以告余余曰財者民之心歷
年出費未有已時民之不能無怨者情也鐵夫之不能免於怨者勢也

此舉事之所以難也雖然太和微鐵夫吾見其與蒙亳穎霍等耳安能
獨完哉請為我語太和士民曰慎無忘大德而思小怨

繆君孫蒙家傳 王寶仁

君姓繆氏諱兆禧字鴻儀號孫蒙先世由蘇州遷太倉曾祖諱之鎬字
載章號杏江州庠生祖諱文溶字瀛海號蒙泉嘉慶己卯舉人揀選知
縣就職國子監學正父諱慶綸字晉襄號小泉邑庠生兩世皆以軍功
贈奉政大夫祖妣氏王妣氏錢

贈太宜人蒙泉先生工文辭學者奉為圭臬文名與東門李氏相頡頏
君承家學自少文已斐然弱冠後補博士弟子員旋錄於庠省試屢薦
不遇庚申之難避居崇明以免及官軍南下時錢中丞調甫督辦軍米
君贊襄之往來江北告羅冒風雪涉濤備嘗艱阻轉漕賴以集事君
為人和易謙謹邑中善舉必與同志盡心商榷而後行

國朝選貢定制大學一名分縣兩學一名君援四川新例分縣得每學
一名商諸邑中諸老請大府聞於

朝得

旨准行於是太鎮兩學各選拔一名自同治癸酉始其議實自君發之

他如積穀濬河書院義塾育嬰相葬等事君悉任勞爲之君體素強壯中風暴卒同人咸悼惜之時同治十二年閏六月朔日也距君生道光二十一年十一月二十七日年五十有二邑廩貢生分發試用教諭

賞五品花翎軍功隨帶加一級配吳氏江甯縣訓導逢甲女子四長朝荃邑廩膳生同治庚午補丁卯優貢內閣中書次朝薰前卒次朝藩太學生次朝芬候選縣主簿女一未字卒孫二毅詒毅昌子與君習頗知君子主安道書院講席朝荃又來肄業今朝荃丐爲傳述其梗槩如此遂詮次其語以附於家乘云吾鄉自兵燹以後老成凋謝里中善舉能盡心如君者蓋尠而君遽溘逝其可慨也夫

內閣典籍銜河南嵩縣訓導李君墓表 方宗誠

咸豐十一年春余客豫撫嚴公幕時兵事方殷勸公以籌餉練兵求才綏內攘外策士以通輿人之言亦藉以觀士所蘊蓄得一卷不署名其文通達精實體要訪之知爲太康歲貢生李君也幕府皆驚爲積學異才然君生平足迹不入官府余乃親詣其學舍與談果有學守君子也因請君文集盡讀之曉暢時事深識政體敘事凜然有生氣近時北方學者之文蓋無有與之比竝者然君虛懷不自足昕夕學靡閒得余文

續碑傳卷四十六 上

往往手錄多至數千萬言蓋君雖困於諸生無所設施其在里中於勸農桑免雜派設守禦采訪忠節凡有益於民生國計者知無不言爲無不力然義所當行不避難非道所當取不以毫髮苟且其在於家以己產讓於弟而自授經以養妻子師喪不能葬鬻田濟之爲文表其墓道故舊子弟門人貧無以自立者資之耕讀多所成就其爲人師講授不倦而尤以重道義輕貨利崇節儉慎出處爲要其後爲學官亦然生平無僞言僞行故一時賢者往往喜從之游余亦藉君得盡交當時賢士河南學使景公訪余以君及鄆陵蘇菊邨西華于綱齋應景公疏薦奉特旨俱以訓導用同治五年二月選授君嵩縣訓導士心說服八年巡撫李公奏請

賞加內閣典籍銜余與君交一年遽別去客湘鄉曾相國所同治四年君應署江蘇巡撫劉公聘至江蘇登焦山去余遊焦山止一二日竟不得相遇君以書告余悵惘者久之旣而君去爲學官余爲曾相國疏調來直隸音問不相聞者數年十年冬余令棗強忽得君子書乃知君以正月二十二日卒於學署矣距生於嘉慶十八年年六十歲君名濬字又哲一字秋圃妻宋氏子四人其所著曰秋圃齋文集若干卷摭匪紀

略若干卷君教澤在人門人子弟欲爲榮行其文子選樓宣樓京樓星樓以余知君行最深屬爲表其墓君之文必傳無疑後世當有知君者同治十一年春二月桐城方宗誠表

唐先生教思碑

譚廷獻

竊聞之師也者傳道授業解惑者也蒙之言曰天下無私師古者師有家法弟子名一師則終身焉爾自天子而下皆有師養老乞言朝之師也父師少師致仕之卿大夫爲教於鄉焉仕學遷變師道日廢然而國家甲令郡縣有學學必有師通都下邑由宋以來則有書院書院則院長爲之師二者接踵或稱或不傳道尙已蓋慎言之授業解惑竝吾世而有唐先生安慶建行省懷甯爲附郭縣光緒二年縣令彭廣鍾始建鳳鳴書院閱六年獻涖官諸生言曰吾師唐先生固懷甯學師也到官五年主鳳鳴書院三年矣獻告之曰唐先生吾友也嘗同校安徽通志純白安毅亦吾師也唐先生之教何如曰先生敦內行孝友無閒教以樸先生博極羣書爾雅深厚教以文言必忠信行必篤敬教以君子誦詩讀書知其人論其世教以向友獻曰若是其厚矣至矣非書院所得私諸生曰懷甯學弟子員數百人七鄉散處或者游於四方于于焉

續神傳卷四十六

五

詣於庠校束修承誨歲一再至書院者拔數百人之秀良服習於齋講授於堂請業焉請益焉庶幾名一師弟子如古經生家法匪私也若或私之獻官懷甯不再替屏僕御設茗粥與唐先生談藝訪治不能數數見也吏事敦我五六接席而已見則悠然廓然者且數日十年夏四月獻已奉合肥檄未受代而先生病病一日卒寢門之哀獻與諸生雪涕相向也先生名瑩字子愉太平府當塗縣人七葉爲儒力田逢年一門相師友學旣成道光十七年舉於鄉數上公車輒報罷主敬亭中江潛川廬陽書院身教言教其有用世才兵起避地襄漢閒大府禮敬任以筦樞綽然就理亂定歸則受志局聘始終成書乃喪其壯子舉人汝璟於是盡傷差以道力自遣耳志局罷選授懷甯教諭貧而樂道卒於官年七十有二歲初彭大令營建書院徵培文洲租以爲膏火資連歲苦潦賦入不登講肄幾輟兢兢焉爾獻與先生商推經歲始得邑之宦達蠲金謀久遠規模狷舉而先生卒不佞行矣諸生習先生之遺教且旁皇且纏綿不澹澹忘之也於是祀先生於堂春秋之日聿薦聿享而以獻於先生雅故書院又有司職也請爲文以述之易臨之傳曰君子以教思無窮唐先生其人與作教思碑竝紀先生生平庶有傳焉

強賡廷先生墓志銘

馬其昶

先生諱汝詢字蕘叔號賡廷溧陽強氏先世家錢塘宋時有祠部郎中至者佐韓魏公幕祠部五子皆第進士四子淵明至禮部尚書愛溧陽溪山止焉是為始遷之祖曾祖秉康祖巒考漆舉人甘肅安定縣知縣生四子先生其次也幼而英碩神采外流七歲能了說史記大意安福阮侯亭一見器異來嬪以女咸豐九年以選拔貢生舉順天鄉試篤於稽古銳進無老怯於取榮勇退無少久之選授贛榆縣教諭終不到官先生之學自經史諸子百家方伎之書一皆練習窺見要指以為學期博不期雜期約不期陋晉六經大義搜抉叢瑣茲雜也匪博也屏絕羣籍取足吾心茲陋也匪約也惟博不雜惟約不陋舍程朱其疇歸因悼痛當時學者外躬修祖劉歆班固敘書以六書概小學且以概大學非周官師氏保氏之遺法其或不出於是則又馳驟功利昧厥原本於是著大學衍義續七十卷踵前書之成則矯邱氏之遺失又以聖人因魯史成春秋其書有義而無例有筆削而無褒貶著春秋測義三十五卷其為說雖多要一本聖人宰時育物之指鑿然可效抱能在躬百不施一纂述終世不求聞知意量蓋泊如也初避兵亂井日一食巡撫李公

強總樞商貨難其人將任以職堅不肯赴會湘鄉陳公混授山西按察

三

使提湘勇三千主防務曾文正公勛以求賢自輔虛左迺止贊畫中機是時晉兵大抵嶽不可用陳公構疑忌先生為草陳方略言防地遼闊而吉州以上二百里嚴冬永牢結車馬如踐坦道當築礮堡益募新勇捶扼不然晉禍必自吉始事格不行至冬賊果由吉州渡水掠蒲解絳霍之郊陳公罷職別去其後曾文正公重蒞江南雅意尉薦居無何公薨而先生亦將五十矣當是時曾公最能得士所推轂皆天下之選先生晚出竟嘿嘿不獲藉手道之廢興固各有命哉然士論益以是高之平生內行敕備孝友烝絜動有措息有則一生斂抑舉室互戒祗嚴既久乃得大和人以謂先生之學也不惟其學惟其行也先生之行也不惟其行惟其學也其所著書又有文集八卷詩集六卷讀書記五卷隨筆二卷漢州郡縣吏制考一卷金壇見聞記二卷女學內外篇二卷堞積衍術四卷惟說大學春秋及詩集已鈔板餘皆寫藏於家光緒二十一年六月五日卒春秋七十有一配阮孺人前卒里郇稱其賢側室敖氏子二以次子承大宗後長敦信邑廩膳生早世次敦保孫惠疇皆縣學生女二長適金壇段維柏次許聘丹徒韓氏以光緒二十二年十月庚

辰合葬於北鄉官莊之原先生弟汝諤有學行兄弟間自爲師友先期以狀授其昶銘其昶願嘗辱先生過聽之譽且習讀其書不敢辭銘曰聖塗久蕪一踊萬趨胡口則庇而躬之矚有璋一夫居約而盱蹶然搯筆揭日天衢其行可則位不究德焯勤詔遐視此貞刻

續碑傳集卷四十六

續碑傳集卷四十六

十四

佐貳雜職

諸贈奉政大夫左春坊左贊善候補東河縣丞外舅趙君墓志銘

張穆

君諱學彭字子述武進趙恭毅公五世孫也恭毅長子侍講公熊詔生

兩浙江南都轉鹽運使何敦都轉生刑部郎中繩男刑部公二子長懷

玉世稱味辛先生次球玉以孫振祚官

贈儒林郎翰林院編修君之考也穆為趙氏婿距君歿垂二十年未獲

一親言論然時時以君素行諮於所識武陽之人皆君之舊游至戚也

安邑知縣劉君承寬曰先禮部少治春秋為胡毋氏之學人罕達者君

一見獨通知科旨會學使案臨即抒其義於應試之文學使奇賞之拔

置第一補縣學生先禮部為諸生貧甚館穀所入率舉以付君君為營

置生產家賴以小康先禮部題君遺照曰吾家待子行謂此也宗人府

丞吳公孝銘曰子述內行修飭而意涉恢奇年未三十秋試輒偃蹇失

期旅橐常不充及走探之乃見其盛召賓客為歡燕若重有所規畫者

時以吏事自急救迄亦未得一展也開封知府董君基誠曰子述嘗為

我言其志趣而深有意乎馬伏波之為人與人氣誼諄固急貧糞數

百金未嘗索署券曰無合後人破我交情人以此號君為俠陝西山陽

知縣周君儀暉曰嘉慶末年君以縣丞籤發東河蘭陽之役姚亮甫中

丞夜出視工員勤惰見君頓且寒慰之曰才不可恃此為腥羶地有才

者尤當慎君對曰學彭先恭毅裔職雖卑家法不敢踰中丞解衣衣之

曰李制軍世傑即由丞倅起家君勉之矣因以屬周觀察以輝觀察延

君幕中賓主雅相得及君遭疾疫歿觀察哭之慟以百金購良材斂之

且飭屬廳厚飲之需次一年而獲上信友如此非有實行動人不能也

穆既習聞諸君言已讀味辛先生亦有生齋集題君遺照及祭文其言

有足與諸君相補者略曰子述為先刑部府君鍾愛又為吾弟家督賴

堵門戶其容豐其性醇才又能肆應於理皆宜得壽又曰諸姪之中汝

性尤慧年裁舞勺已通諸經既冠余服官京師汝代吾之職深得大父

歡心先意承志服勞罔倦戚黨嘖嘖不閒人言嗚呼宗族稱孝鄉黨稱

弟君可謂不媿士行矣卒以道光元年七月初四日年四十三配劉氏

誥封太宜人文定公女孫申受先生之妹安邑令承寬姑母也道光二

十七年二月十九日卒年七十一子男二振祚乙未進士左春坊左贊

善

善振禪嗣弟學偁後女子四人長字刑部主事青陽王元林未昏守貞次適平定張穆次適工部員外郎太谷賈世行次適同邑巢廷翰孫男

二人忱怒振祚卜葬得吉壤屬穆爲製銘銘曰

聖清名臣恭毅首出循聲清德世載勿失君才騰異又邁良時鬱有其抱未室厥施蘭陽小試疾來如風有子繼起經術愷深君抱其摠九京

破涕我銘不私用式奕世

大城縣典史沈君傳黃雲鶴

大城縣典史沈君既歿之二十五年其孤元溥與楚人黃雲鶴同官兵

部乞爲傳會雲鶴出守雅州不暇爲元溥乃抵雲鶴書大略曰古信史

之作不必王公貴人苟有實可紀自儒林循吏獨行以迄游俠貨殖之

流皆可爲傳後世史漸失實然猶得失參半近則祇許卿相疆吏立傳

砥行礪名遜世不見知之土泯滅無聞者曷可勝道是可悲矣雖然王

公貴人雖有傳傳者蓋鮮爲人後者乃鋪張先人功德求當時負文譽

者爲傳誌以誇耀鄉里自蹈侮親之罪使立言者蒙徇物之譏不肖深

恥之先人棄養久不肖痛心疾首感幽憂之疾不得其人卽不敢求爲

立傳自從執事遊私幸得其人念足下文不苟作又惴惴懼欲請輒止

不肖幸聞教於君子矣侮親者不孝欺人者不仁以是傳其親毋甯無

傳也執事進不肖於可教之列許傳其先人先人困未僚行不究其志

得執事紀實之文其信今傳後矣元溥每爲雲鶴述先世事輒痛哭不

止吾所見交遊閒久不忘親無如元溥者且元溥骨鯁士其言信乃爲

立傳

沈鉅字玉峯又曰二如吳江人幼篤學以貧故就尉非其志也歷官大

名大城兩縣任大城最久縣隸順天南境有子牙河滹沱支流也伏秋

泛漲最爲民害隄歸民修築官不過問道光庚寅河決大吏檄君治之

再旬工畢費省而役靖民稱便後遇伏汛至民咸籲大令請君赴督焉

會歲饑

詔拯之胥吏因緣爲奸官奉行而已民多餓死君力除其弊調門冊與

振荒冊校勘汰冒濫錄貧弱旬稽嚴密吏術窮厚餽遺君君痛懲之荒

政辦比癸巳歲再饑君振之一如前所全活無算邑多火患君率耆老

爲救火會火患息庚子海防戒嚴徵調急邑當孔道輿馬夫役猝無應

差役四出科派境內騷然令計窮求策於君君曰速追還差役事乃辦

令駭曰事急矣科派尚不能支奈何乎追還差役君曰是所以速之也

役叫囂隳突富者賄免貧者逃匿飽若輩囊適債事耳宜諭鄉民不復遣役但令民公出車馬聽調釐富民爲三等均其役上者戶出一車次二戶一車以降無車者免令稱善卽令君治其事集民無所苦君嘗曰居末秩者藉口貧仕急急利祿厚自污夫官何貴賤視自立耳卑官能崇志行卽何嘗不能益人故所在勤其職捕盜賊不遺餘力尤加意恤囚先後斃獄二十年囚無病死及逸者性剛疾惡自奉清省願喜急人難卒年五十二其病也邑士民赴城隍祠祈禱焉櫬歸具酒漿奠者屬於道觀者爲泣下云

論曰官無他盡所職而已尉於職可謂微矣然賢者爲之其可紀乃如此令大於尉其設施當如何惜乎其僅尉也然卽不尉猶之尉也元博所述君敦孝友篤行事尙多以君爲尉能自立亟傳之以爲居下僚者勸其他行事不具論

劉泰占傳

齊粹元

君姓劉氏諱光宣字泰占桐城人祖諱日啟

贈文林郎父彰裕授登仕郎君幼力學就郡縣試有聲而屢躓於督學試少事父母孝養備至營祖母窶窵尤致力年三十四援例授從九品

續神傳卷四十七

職分發廣西候補歷權崇善典新英州同知三都巡檢奉議州判安城巡檢南甯府經歷補三官巡檢調潞城巡檢所至士民皆安其政作詩歌頌或具狀請留其在三都也有盜誣良民爲黨逮鞫之民曰未也君乃使民廁吏胥閒出盜謂之曰誰爲汝黨耶盜不能識叩頭謝罪民誣白遂釋之其在安城也有姦民雷某者甚橫恣肆毒於鄉莫敢發君牒長官捕治之民害以除君居鄉好賙卹道光三年歲大饑君常陰濟無以舉火者家有舊券數千紙君取而焚之不告其人嘗在官舍畜一奴踰冠君恐其羈沒終身乃還其文契遣之歸且爲籌生計焉道光二十三年十月十日卒於潞城官廨年五十娶金氏子召之議敘九品銜蘇惇元曰君嘗訓其子曰事上必敬御下必寬居家宜儉待客宜豐甯人負我毋我負人於乎此蓋君所自勸者卽以訓其子也余與君兄泰來及召之久故而獨未識君君歿之四年召之乞爲傳列於家乘乃據所述而次之

書典史楊培

何慶元

楊培浙江會稽人道光辛卯爲桂陽典史明年尙遙趙金龍亂衡永郴屬大震桂陽故設參將營兵四百精銳盡赴永餘老弱某散守烽汛駐

城兵弁數十人率恆怯無固志奸民敵虛潛結嶺南江石諸不逞覬爲
變氛甚惡瑀偵知之甚令聯鄉村練壯勇備器械謹謀探以待非常議
未決北鄉報劫盜瑀謂其鄉豪之在城者遄歸斂眾我將往因慷慨請
於令曰賊善謂我不敢出也疾撲之彼不虞吾猝至必就縛民志定賊
黨攜矣乃選健役八十人疾馳五十里至其地而鄉豪亦糾壯勇三四
百人與瑀合夜半搗其巢賊果倉黃鼠竄盡繫以歸寘之法當是時賊
首李觀章者方安居與甯老巢聯絡諸山賊悉索大舉得漏網瑀復甚
令牒與甚參將檄土官帥新民刻期會剿而密諭鄉豪集壯勇待於隘
圍合火起賊驚潰突煙出縱橫滿山谷至隘觀章與其親屬盡爲壯勇
所獲無得脫者觀章死與桂額手相慶先是北鄉告警南鄉亦闖平倉
者劫倉也蜂蟻聚指鎖擴門者數家矣尙畏死遲瓜分瑀聞之曰亂可
遏已也北歸之明日甚令召鄉豪爲眾所憚者數十輩教之團練曰爾
鄉近粵剽掠者且至亟塞隘穀將焉往先自亂資敵矣且觸憲
國法將不汝容翼日吾將命典史爲汝布置瑀則帥其健役八十人者
與紳民大會於井坡墟墟中南鄉民麇至瑀從容曉譬利害咸俯首受
約束富民量產捐米贍丁壯守隘者而村舉一二人爲之長條畫井井

續傳卷四十七

四

俄頃而定趙逆平令以軍功晉級瑀典史如故又明年瑀丁內艱貧無
以爲道途資紳民贖白金累數百始克歸葬畢旋湖南桂陽科舉寓省
者往來存問密於戚故己亥瑀卒安化典史官解貧不能反其柩其子
成謙訃於桂桂人念瑀出死力捍大患而秩抑遇遄竟蹉跎以死潸然
涕出助之金并爲文以祭其辭曰天降疾威陰霾風烈草卉繚枝松檜
斷節柔以眾完剛以獨折莫夷其萃乃摧其傑惟公之生天挺峻骨海
汐走霆娥江濯雪胸直膽勇眼冷腸熱抑在下僚百鍊寸鐵皇帝壬辰
尚搖草竊風鶴訛傳狐鼠黨結公適尉茲見義奮決時維鷹揚突入虎
穴迺芟其莠迺殄其蠶疾雷一震乾坤開揭曾不崇朝奠此龜龜大難
既平薦紳忻悅東閣長開茗馨酒冽賦詩論文談笑玉屑旁及書畫爬
羅剔抉酣嬉淋漓撫掌纓絕歡娛未終悲聲四徹玉佩瓊瑤轉眼桐絃
風刀霜劍生離死別老曠翹雲夜鳴嘯血琴鶴淒涼土友結舌白衣西
關送公歸浙需次省垣養晦抱拙一官匏繫門多車轍風雨故人膾鯁
魚鼈傲骨豪情吞吐鬱噓晚得梅城吻噤肘掣鵬鳥欺人登坐鳴咽乘
彼白雲去如電瞥烏乎我公自今永訣干將莫邪堅剛沈閉屈產冀北
權奇蹉跌永跖歿顏福庸阨哲天道如斯抑又何說惟公生平友朋悃

切下堂執手一言嚴蔑寸心耿耿天日照哲三年不見夜臺已鏤拂拭
孤桐哀訴明月搔首長空絃絕聲歇公其有靈魂來悅惚

周芋生墓志銘 沈道寬

君諱詒域字芋生姓周氏世爲湖南湘潭人曾祖某祖世宇奕世儒素
蘊德弗耀父系英以翰林起家爲戶部侍郎君生而凝重寡言笑事親
以孝聞先意承志盡得父母歡心少喜洛閩之學顧嘗病講學家空疏
無故尤留心經世之務兼綜並究得其領要工制舉業取法先正而不
能詭與時遇侍郎公常慮之卒以此屢黜於有司歲乙未乃以待郎諸
門生蘇寅得浙江鹽運使運判浙之鹽分四所甯紹二所被浙東嘉所破
浙西之杭湖江蘇之常鎮松所破江蘇之蘇松二郡隔省地遠積弊尤
深大吏檄君往清釐之君途次卽條列弊端及因革之要娓娓數千言
大吏異之至則屏絕苞苴且不受商人供張眾商大畏君按籍鉤稽盡
得其實謂商曰汝輩能從我措置則前非不究也商始而駭繼而懼卒
乃甚喜於君所設施行惟謹所列諸條次第舉行乃以君權分司事
以專責成未半載庫溢三萬課大吏下其式於諸場使仿爲之然君行
之則有餘他人行之輒數數梗教殆所謂有治人無治法歟會本任某

續神傳卷四十七 五

來衝替隨檄君權浙東副使未幾中飛語爲台臣所劾時撫浙者爲烏
爾恭額公素契君亦附糾君撤君任事得直烏公甚愧之君若無事者
於是人咸重君歲庚子逆夷躡定海沿及乍浦乍浦同知乏人人咸觀
望不敢前新撫劉公韻珂廉君才謂之曰此地非君不能據所蘊以報
國於君有厚望焉君其勉之因以君權同知事鹽曹守地方非故事也
君感劉公之知卽馳往地經逆夷礮火轟擊極虵虵君相度要害請立
礮臺二又增築海壩護塘使逆夷巨船不得就岸先是各邊海郡邑議
練鄉勇爲禦敵計且以羈縻游民之爲夷人用者乍浦爲番舶聚集所
多閩越無食之民爲之肩財貨獲厚直隸以行伍口糧僅五之一旣虞
經費不足勉使入伍且生變當事者難之君議仿踐更法選健者九百
人爲三番三日一較技藝休日任其肩貨得雇直如此則經費省而士
卒亦樂爲用凡所籌畫皆中窾會至今乍浦侍以無恐劉公將徧閱海
壩求禦夷方略檄沿海盡築塘沃以水使固檄與公先後至他所方議
鳩工至乍浦則已築成四十餘里完堅甚公驚曰何見之先也而君已
身心並悴矣君在事不舍晝夜不避風雨燥溼至是得重疾民事軍務
蠶午蝟集猶應接不怠遂不起年五十可謂以死勤事矣君見義必爲

勇於任事有蜀孝廉歿於京君與一面識歸其喪同邑某孝廉亦病卒
旅次君周其妻子力爲營養膳送其柩歸君娶王氏有子一人翼洙國
學生女四人皆適仕族翼洙將於某年月日葬君於某原以狀乞銘銘
曰
究心洛閩以繕性孝乎惟孝施于政奸胥富賈互掉磬鉤稽簿帳釐而
正國儲斯裕商不病防海力卻鯨鯢橫以勤任事國是定新阡奕奕松
柏盛我銘其幽惟其稱

江西鄱陽石門巡檢毅山王君傳

錢寶琛

道光己酉四月二日吾鄉毅山王君壽終於里第先是丁未正月戚鄆
爲君稱八十觴余旣爲文序而張之至是其孤瀨等狀君出處事跡諉
誣作傳余與君中表戚屬又君官江右余適秉節是邦知君最悉爰濡
筆而略其梗概如左君諱廷偉字卓人號毅山太倉州鎮洋縣人王氏
自明相國文肅起家至縱山太史煙客奉常代有聞人奉常又五傳至
君考悟香先生俱仕宦有聲一門鼎貴君游庠後銳欲以功名奮六試
秋闈不售嘉慶丙寅棄舉子業投效四川達州軍營在檀木場打仗出
力爲大學士勒公薦舉議敘得官留川十三年當事聘請教讀及主書

續碑傳卷四十七

六

院講席無虛歲己卯入都投牒吏部以從九品籤發江西前後署篆凡
十九次所至有聲譽其最著者於萬安建橋利濟於龍泉禁免浮派運
糧駁船查辦沙井振務皆灼灼在人耳目者最後題補鄱陽縣石門巡
檢石門係故廣晉縣地後縣廢而名鄉分轄甚廣界連數省下車後勤
慎自矢刑不濫施民無作慝時江浙徽湖被災流民過境日以百計君
倡捐錢米資送人無失所歲滿謝病歸年七十六石門空邑遮留不能
得歸家囊橐如洗仍訓徒爲業處之泰然舉戊申年鄉飲大賓一日無
疾執卷端坐而逝年八十二君喜吟詠有自訂毅山詩集性端嚴雖暑
月衣冠必飭待人和而介及門甚多有由科第至大官者從未以竿牘
通生平不喜浮屠家言獨母喪茹素三年云

論曰余聞楊司馬言曩令德化時王君攝縣尉尉故職監獄每夕必巡
視數周風雨不輟囚無瘕死者余詢之輿論良然今世士大夫好談經
濟究其所設施求如古所稱循良吏者蓋鮮語有之一命之士存心愛
物必有所濟豈地益親化益易究乎抑誠之有至有不至也書曰敬爾
有位亂爾有政王君敬之矣

朱雪垞權葬旅歸園碣

宗履辰

山陰朱文懿公之裔孫梅字雪垞後就官名兆奎生負備才白哲長身亭亭如玉立乃南北試屢不第弃而遊海南尹蕉園將軍慶保雅重之草檄賦詩深相契洽將軍內調從之北還復客灤陽馳輕騎出塞門顧盼自得其時四方無事振奇之士無由立功樹名將軍亡君益落落罕所遇賣文爲活久之道光中東河帥請簡水吏君僂應之與選

命往以筆札之長重於河濟聞文帥一輩愛其才禮遇在諸參佐上

文帥叱咤嚴厲而好聞善言君常有所輔贊一日偶陳濟州多旅糶而

少歸土帥慨然令擇地率屬購之而垣其外宇其內名之曰旅歸園

之成君力爲多文帥去官後君由牘官巡檢而進主簿河事甚熟各帥

稍稍相倚而君不喜奔競有土人風故歷十餘年無美遷咸豐初文帥

從軍至河北相約隨勝都統保追寇訪求壯士廣平楊六教師等與談

兵法將與其征戰以訥相北走先招文帥去致失事機遂快快弃弓劍

復浮沈濟上隱於書畫小藝迨權鉅嘉汎簿佐州長捕蝗焚撲幾盡尋

升汶上汎丞時皖捻數寇東境與南旺士民力籌圍練皆奮起欲以爲

令格於例不果其蓄湖水灌運河每齋心祈禱乞雨雨至乞潮潮長人

傳誦之大吏聞之嘉歎未得薦舉以展所施勞身鬱中致櫻肝脾傷竭

之疾今年二月遽卒於官年六十有一卽權瘞之於旅歸園君長子宗

保元配王孺人所生孺人余姑之姪也母子俱前卒繼室鄭氏生一子

九齡已入塾矣侍疾勤臨喪哀以爲可克家不意距兩月又以疫癘殤

可爲至慘矣嗚呼君於東武朱氏爲大宗之長不可以絕當告族人爲

之立後其先譜遺像與文懿全集手蹟素所藏守者宜有所付託其生

平志在依先壟今與幼子權窆於此神必不安然而世家微宗法廢宦

囊蕭然鄉關復梗阻安得大力者舉之以歸故土乎姑爲記之以刻諸

冢前仍曰權葬尙望其終得歸也斂君者舊戚會稽宗稷辰葬之者故

人四明姚葆恬與峽山何晉錫承錫伯仲也咸豐十年初秋稷辰志十

一年仲春書

吳榮輔傳衡陽縣志

吳榮輔高郵人副貢生成豐中補衡陽縣丞好讀書嗜酒飲少輒醉有

責家訟寺僧繫至庭榮輔方醉出視狀僧實貧而責家以勢逼之伴問

僧若何爲者僧以實對則笑且罵曰公堂豈避責臺耶麾之去責家瞠

目而已五日節榮輔醉行視吏舍見拘囚數人笑曰佳節行樂若等胡

在此顧命從者悉縱令去凡拘丞獄者小犯耳有球請則釋榮輔恥以

在此顧命從者悉縱令去凡拘丞獄者小犯耳有球請則釋榮輔恥以

爲利故以醉遣之胥役大望其落拓如此坐此益貧竟終於卑官
衡陽縣丞吉君傳 衡陽縣志

吉彥英丹陽人以拔貢生官州判借補衡陽縣丞六年不受民一牒大
事移縣令小事諭遣之丞尉俸請不足給八口又不得全給故惟利民
訟小通苞苴而已彥英既廉靜則躬率妻子種瓜蔬以療飢胥役皆歸
力農查江民至今稱歎之

贊曰仕非爲貧曷爲卑官吉君疏放高風邈焉優哉游哉聊以自閒傲
彼俗吏狂簡斐然

陸鯤溟家傳 宗履辰

桐鄉陸氏本象山先生之後歷十世至甲子年丈故廣東任花縣令
星槎府君諱瀚生五子其仲名喜曾爲余同年厥弟憲曾字慎齋號鯤
溟者府君之第三子也少有雋才丁年入庠試輒異等道光辛巳薦幾
中而見擯經四黜致嘔血成疾遂棄舉業汎覽羣籍兵家法家術數無
不尋究志期有用辛卯歲番舶大競君方侍親在粵心切憂之上書當
道萬餘言不見聽有欲以奇材異能薦又見沮其時尊府已罷歸家計
蕭然君急爲養親計就捐州吏目分發直隸爲大吏所重尋遇憂起復

續傳卷四十七

八

後奉母北行歷署唐縣成安開州諸尉其在唐治廣利渠有勞在成安
值縣令以事出代行良久其政皆理民心大懼時論謂君才不當長居
下僚矣咸豐三年遭母喪時寇侵中原畿甸亦警君又毀瘠不勝然念
權葬於北入將不得還故土竟從烽火擾攘中扶護歸先兆葬事克咸
疾亦漸愈服闋改發山西撫部恆福公前爲畿藩器君才至是委佐軍
需報銷局兼襄奏記七年解鐵三百餘萬勛於京師以供鼓鑄余謂君
蓋謀少展驥足地平乃改捐直隸州州判仍至晉爲學使彭公瑞毓所
賞招入記室兼巡察使院差執事甚恪廉得校官有僞造關節影射取
賄者白學使黜不取諸弊遂絕亦見重於諸長吏五臺縣調簾之員以
君往代凡三月鋤豪祛蠹平反獄囚治聲甚著同治初補解州判治運
城運城多富戶大賈廩集俗豪侈君以寬字民以嚴馭賈咸畏愛之向
市有官價君多裁革有士流以訟事私謁正色拒之芮城有逋流某至
運城邏者疑細作察其證得免死寇從潼關竄河南之會興鎮揚言將
渡河河距城百里民洵懼多遷避文武將吏多思遜君語家人曰吾官
雖卑世受

朝廷恩有守土責脫不能守當率妻子俱殉聞者泣下適河水暴漲賊

不得渡引去亡何再來再引去於是增修城堞募鄉兵周巡督責不恤勞瘁城以獲安而君身憊矣以竭心傷脾泄久不止遽於二年二月二十三日不起其生在嘉慶八年閏二月年六十有一所著有繕性居詩集六卷續存一卷詩餘尺牘又若干卷三娶皆陳氏一歸安兩續嘉善則姊妹也生子三庭臬直隸縣尉芝祥辛酉舉人廷玉監生女子三余與君家世有年誼又素因文字契以兄事余遠隔千餘里常以詩文相質其沒也余爲詩哭之諸孤以歸葬未有期先請爲之家傳

論曰士之志功名者苟有所試盡心力赴之往往不得其養而致摧隕鯁溟半生抑塞不遇所傷於中者已多迨晚稍見其大知以繕性自救乃困於防警遽爾齎志以沒甚可惜也未竟之施以待後起三子其重勉之哉

陸大夫墓志銘 譯廷獻

所貴乎循吏者以其勤民也勤民也者親民者也古之有司守令而下丞簿尉各舉其職課績程能去民也近其勤易施漢魏聞人位卑而名高悉數不能盡後世大吏日增多在下位者束縛而無以自見顧雄駿君子懷仁抱義威則威惠則惠效捷而事專眎其人而已顧亭林云小

續碑傳卷四十一

九

官多則天下治有以哉陸大夫名枚字建中浙江山陰人遷蕭山大父涵遠父閻風嗣於大宗則祖名遠考東高父以諸生游京師名動公卿君亦留都下十餘年習與巨人長德上下議論故才益博達宅心尤和厚出官而不以未秩自菲薄也宦游安徽任桐城馬蹄石巡檢地當古樅陽漢以來名人游覽馮弔射蛟之遺蹟盛唐之歌如聞焉爾君之官曰此固陶士行治所也吾安敢不勤以繼古賢於是日討四民脩庇告語民見君疏食大布之衣而孳孳於興舉廢隊則奔走恐後爲梁治道飢者饘之病者藥之未足多也大者乃力止菜子湖築隄以爲舒城潛山旁七邑水爭趨樅陽以出大江湖居其內山洪匯之外漲緩內流駛隄之則泥沙墊隘非順水之性也濱江戚家磯石齒齒爲行舟畏涂道光中君鑄金創眾造救生船事幾幾不就迂笑者走匿築黠之人至百計沮傷之君不爲動終以誠感四十年不廢歲拯數十人死者瘞焉汪公子者豪貴人也銜細民牧馬者以危言告大府謂有陰謀將中以奇禍君乃走白大府事始寢咸豐八年大帥率師逐寇過樅陽兵士闕於市者君縛而笞之乃闕於門君曰彈壓吾守官也笞兵丁爾帥且告大府君待臯而已若何敢譁卒斂手去君能立威重非响爐者今者懷甯

李丞亦管軍士健吏不當如是邪桐城陷賊官軍復之大吏信君能檄攝縣令邑人許從賊者若瓜蔓君多方出其鼻以爲救死之人不當概繩以危法仁而愛人固素所蓄積與城以內設育嬰堂君久於從陽知溺女之俗去城遠力不能至終棄不顧敦勸善士分立於從陽蓋永利寺云所全活又無算解縣事還從陽先後三十六年時大小吏無久於君者矣同治八年乞病去時君長子顯勳已官壽州知州由四品銜加級請二品

封典大夫之誥諸子者不外躬行所謂身教也光緒十年君去官流寓從陽又十三年矣疏食大布之衣如平生從陽之民親之如孫子之依祖父也五月三日沐浴端坐卒年正九十廷獻官懷甯嘗課圩隄民工往來從陽入陶長沙之祠徘徊庭宇扶杖之老猶道君治行僕指不能盡亂定元氣未完又潦歲也安得大小吏勤如大夫仁如大夫威惠如大夫庶育蘇乎距君居尚二十里不得以鄉里後生撰杖老成之側於今思之如有失也丈夫子七顯勳嗣叔父後煥從九品前卒顯仁糧道庫大使柴殤炳巡檢獻附貢生銑知縣孫六人君之卒也顯勳方以俸滿入

黃碑傳卷四十七

十

親歸未至皖聞喪星奔與諸弟卜葬於山陰天樂山橫山岡以配王氏合葬焉元配周繼室王姚皆別葬顯勳與廷獻雅故馳書狀廬州乞銘按狀書其塋塋大者無愧古循吏於義宜銘銘曰

拄笏者誰吏則傲陽陽趨走無特操下此股民若炙燎繁陸大夫德自燿委吏藥田聿聖功矧同王臣一命庸處位惟廉治惟豐繁陸大夫羞卿公黃耆者賢子揖揖理縣之譜垂家集水有蘭渚山有莪繫陸大夫過者泣

記三典史 程曉

三典史者大興陸昉紹興王潤江登州孫葆均也陸君初游汪翊甫司馬幕與予爲文字交偶談東臺修理義冢事君遂進說於汪司馬先一日屬予嚮導往勘徧識之次日汪直達幽隱嚴禁勒石吏民駭服陸君與有力焉已而權泰興典史上官服其才疑獄取決名以大著書告子曰現任東臺典史王君非俗吏也可與往來及見果如其言王君嘗曰我輩所得多近非義以非義之魁而賁小偷之不義愧死矣其事長官伉直精通內典宵行過訪談輒千言未久代去後一年而孫君至其爲人直如王君才如陸君而性情誠樸過之胥徒無食於官例獨徧餉之

故以屢空名尤精方技子孫得疾諸醫束手孫君治之輒效儻出其福
幼之術以福民大試大效小試小效余將於孫君期之矣
論曰子向與官司鮮往來非謂風塵鞅掌中必無人也亦以道不同不
相爲謀而獨與三典史善有緣哉晨門封人聖人且重之近時名臣如
左文襄亦欲於末僚加物色不虛也已

續碑傳集卷四十七

續碑傳卷四十七

十一

武臣一

甘肅涼州鎮總兵官漢軍蔣公神道碑銘 毛嶽生

公諱倭星額字厚畚姓蔣氏漢軍正黃旗人蔣氏故江東望族明初遷山東歷城後復遷遼東廣甯天聰五年公五世祖成良從破大凌河得備禦世職後累加至一等輕軍都尉資仕維續裔以益顯生公高祖國柱官戶工兩部侍郎出為巡撫曾祖熹賢祖開基皆不仕考廷佐用宗法得襲騎都尉加一雲騎尉後公貴

贈如公官妣花氏

贈一品夫人公少以世職補三等侍衛後四歲遷二等兼公中佐領乾隆四十八年出為雲南景蒙營游擊以勤辦遷沅江營參將久之量移武定沅南處雲南極邊氓夷錯居漁奪易倚公撫之率嚴肅有恩所在訓練卒伍尤有法嘉慶二年公請隸大軍誅討白蓮教數轉戰有功時賊首王三槐尤勇獷彘突公嘗追及於安樂坪嶺峻險道陘僅一人行公驟登中石顛墜澗中馬斃身被創賊數百乘之既力超距出創少平

續碑傳集卷四十八

復與數戰卒合攻禽之事聞

賜花翎時賊多奔竄山谷公從大軍屢擊破用是勞卽軍中除陝西將軍軍標副將賊既畏公公益窮追殲滅大羣始公至蜀大帥令率黔兵分道攻賊既克軍還賊有新起者亦立摧殺至盡賊平三歲由副將擢甘肅涼州鎮總兵官未幾罷去故事貸軍府官錢者職不得踰七品公素貧喜施與用輒置會入

朝復缺乃請將軍少假而隨以祿賞及擢總兵官去請至具輪繼者故公將軍又行遠白攝者疏劾竟以是失職先是公在軍中三年大小百餘戰又數與禽賊首大臣多表言其勞而兵部定公功亦次加三等歲

仁廟念公績復補四等侍衛出為庫爾喀拉烏蘇領隊大臣明年遷三等調英吉沙爾領隊大臣公性明毅有謀略既數外任久居兵閒益曉利害先事可決以為酋夷剽輕易怨使者當益務廉靖簡惠使懷德凡鞫疑獄尤慎密不可撓久之

召還以前官在大門行走兼佐領如前後創發乞去官用前功詔解侍衛特留佐領至終然公歿甫四歲而張格爾果叛公初名倭盛

額

賜易今名以道光二年六月二十六日卒官春秋六十有四葬於德勝門外清河潘家莊南合耐夫人金氏瑩夫人明淑能勤先公數月亡子四德某早卒德升襲騎都尉官佐領德宣舉人江蘇江陰縣知縣德福選會典館臚錄孫七人公未生三月而孤不踰歲母夫人喪幼育姑氏克自飭勵聿章功緒德宣又有文學治行嘗請表公墓乃為刻銘於碑其詞曰

維昔績烈多出世胄揭揭將軍發聞稚幼始自宿衛出靖烽候疆執沈雄劫盜是縣戮魁瘞醜用鎮涼州俄致蹉跌伎刻增尤繼屯沙漠領護是屬爰利鉏鋤爰勤游牧挫彼姦萌峻我廉肅既謀既哲既耀既恢乃志病奪如決與摧材非弗鉅時非弗逢勇儲智羨職命奚恫人世利祿儻如飄風動恪躬承爵系丕膺庶詞例適克偉以銘

星額倭公家傳 劉鴻錕

公氏倭諱星額字厚奮漢姓系出蔣氏先世以佐命勳隸漢軍正黃旗世襲一等阿達哈哈番三代皆不顯以公貴

誥贈如例公少失怙恃育外家讀書識大義長精騎射挑補侍衛屢隨

高宗圍射禽矢無虛發 續神傳卷四十八

高宗奇公能

簡用雲南景蒙營遊擊自京至滇萬餘里公悉繪其所經山川險要既抵任軍政大治設鹿角柵梅花坑防偷劫諸營宗以為法故景蒙營當日稱勁旅升元江營參將調補武定營

仁宗改元邪匪倡亂起荆襄聞西連關隴巴蜀南結黔筑公備賊無敢犯境當是時

朝命經略大臣勒公保出兵進勦公念世受

國恩言及賊輒慷慨涕泣誓不與俱生預與家人訣請從征

詔可簡精壯投經略麾下一路勦捕無敵自始征至凱旋凡八年大小身經三百三十七戰未嘗敗挫嘗夜砍賊營數遇險卒能自脫嘗與賊敵賊鎗中公左右立斃公色不動指揮進兵如故王三槐者賊之渠魁號萬人敵屢闖大營諸將深以為患公請於經略謂王三槐一日不得賊一日不能平仗

天威遵帥謨戮力深入脫不幸以馬革裹屍報

國耳追之於走馬嶺賊築石投墜深澗馬斃公傷超距出賊眾至步射

一賊壺再射再磴五射連中其魁賊卻脫歸復搆賊穴故雖王三槐亦畏憚後經略誘降王三槐械送京師公與謀焉奏入
賞戴花翎後賊由蘭州路夜渡嘉陵江成都警公馳赴川西攻殺論功晉陝西西安軍標副將川楚平晉甘肅涼州鎮總兵官緣事去職
仁宗念公前後勞績

賞四等侍衛放庫爾喀拉烏蘇領隊大臣升三等侍衛調英吉沙爾辦事大臣撫綏回部自新疆回以三等侍衛在大門行走兼公中佐領傷疾告退留公中佐領仍戴花翎公論兵法宗戚少保諸家每進兵預決勝負主將違之輒不利嘗言回民本非孝子孝孫馭之不善易爲變後果如公言公之識解多如此卒年六十有四

論曰公在雲南與提督楊公芳善議事多至夜分今楊公以平逆回功封侯使公若在當與楊上下然李廣在漢時號名將軍卒不封侯不封侯固無害其爲名將與

海壇鎮總兵孫公家傳 附其孫古愚君傳 俞樾

孫公諱大剛字劍凌浙江鎮海縣人祖諱玉父諱燕杰俱隱居不仕公年十八充鎮海水師營兵旋補定海鎮標右營額外委五遷而至黃

續神傳卷四十八

巖鎮標右營游擊時嘉慶元年也當是時閩浙洋盜方熾北接山東南通兩粵出沒數千里其渠魁曰蔡牽次則朱濟牽之艇百數十潰數十皆乘風潮往來飄忽無定

朝廷切責督撫提鎮務獲盜公率兵船巡洋遇則擊之疆臣以聞兩奉硃批曰好又於奏報功狀尤翕赫處奉

硃筆作圍於旁蓋

天子聰明神武於行間將士功罪不啻若目擊而將士奉

詔書則感且泣又震懾股栗若天威之臨其上罔敢不力公素勇敢至是益奮四年補福建烽火門參將五年署閩安水師副將旋升廣東順德內河副將護理南澳鎮總兵閩浙總督王懿德以堪勝水師總兵聞有

旨引見未至升福建海壇鎮總兵遂入京謝

召見兩次

賜克食兩次公起行伍至節鎮最大小數十戰戰潭頭禽王杜戰拍胸澳禽楊店戰東西柱禽范中林戰瑞安海口禽周伯元戰竿塘禽李車戰白犬洋禽林秋戰南坵陳發戰北塘禽劉紫紫戰四礮禽林免

吳有戰馬蹟禽駱然戰青龍港禽彭求戰白沙塢斬芟青六禽陳宗章
戰與頭禽陳六六鄭康康戰永甯禽陳角戰臺山禽楊法戰馬砌禽王
松戰披山禽郭淡戰浮鷹禽陳飽戰大咋禽李貫戰崇武烏坵禽林民
戰高麗外島禽王香戰東峇禽不懂簫戰非山禽王長戰獼窟禽胡解
戰積穀禽許但又戰竿塘禽陳海戰北芟禽陳養戰崇武禽李得順陳
元戰祥芝牛山又戰烏坵禽楊亞豪翁亞二亞目戰石圳禽陳據江茅
戰南日禽陳亮戰小咋禽王標又戰祥芝禽許智明戰壁頭禽陳加舵
戰鐘門禽何平平戰小日禽邱金戰下里禽陳談戰五欄厝禽金抄又
戰小日禽嚴東邱戰活與禽曾辛四戰東壁禽高四四戰赤表禽林星
當日文書上幕府率曰禽某某等今略記其姓名如此其草薙禽獮無
姓名可考者蓋不可以數計又其餘緝獲奸宄非洋面力戰所禽斬者
今亦不盡錄也所獲盜船七十餘艘大礮器械糧食稱是烏乎多矣當
崇武洋面之戰傷於額傷於左股仍躍過賊船禽其魁十有八人斬首
十級

聖書嘉獎焉方李忠毅公之中礮而歿也軍氣大沮公策勵將士揚揚
如平常十四年八月會同福建水師提督王得祿追蔡牽於浙遇之於

續碑傳卷四十一

四

漁山麾眾直攻其所坐船轉戰一晝夜至於黑水洋卒裂其舟蔡牽斃
於海時朱潰已前死海盜悉平先後敘功交兵部記名者一交總督存
記者一照一等軍功例給與軍功加一級紀錄二次者再

賞戴花翎

賜翎管小刀搬指韭山之役以失蔡牽降參將護理海壇鎮總兵踰年

仍還其官蓋公之忠勇

仁廟深知之也每入覲

召見

賜克食悉如前二十四年恭逢

仁廟六旬萬壽入京祝嘏恭詣

太和殿朝賀恩禮優渥同時介胄之士莫能及也公自幼好學能讀兩
漢三國志諸書馭士卒嚴而有恩或以緩急告輒周卹之歲散數千金
不少吝有降盜無食公子之資使聚其族墾某嶼地以自食子孫繁衍
遂成村聚因姓公之姓奉公爲始祖焉公爲人如此宜其以功名始終
稱一時名將矣道光元年卒於位年六十有八子六人奉堯侯選知州
顯二品蔭生候選通判鼎鼐福建福甯鎮總兵署廈門提督餘三子曰

奉廷曰鼎晟曰鳳儀皆不仕灑之子懷邦余爲作古愚君傳者也

古愚君諱懷邦字承寵古愚其自號也其祖海壇鎮總兵諱大剛父灑
二品蔭生候選通判未選官卒咸豐二年君由監生補蔭應

朝考列二等亦以通判注選籍君讀書尚氣節兼習兵家言六至京師
慨然有經世之志時粵寇踞金陵陷姑蘇浙東西戒嚴十一年甯波陷

君團練民兵於鄞之大雷得二萬餘人謀復甯波維時諸暨有包立身
大嵐有吳芳林樟村有范邦祚皆與大雷合賊至互相應輒大勝於是

勢愈振君遣謀者走開道約官軍夾擊賊道梗不得達乃命其長子琳
幼子琅留大雷辦賊而跳身走定海與官軍期會同治元年二月丁丑

賊陷定海搜得君書知與官軍有約乃大索得之遂遇害年六十有一
浙江巡撫左公宗棠以聞

詔贈道銜視四品官陣亡例議卹

給雲騎尉世職方君之遇害也琳琅猶在大雷四月甲戌賊由大嶼嶺

突至琅率一軍據嶺上實石如雨斃賊無算禽其渠琳一軍由鳳嶼出

十字港攻賊壘燬之乙亥賊破大嵐攻樟村琅往援賊焚樟村范邦祚

死琅墜深溪中半日始出遂自此得脾疾四月甲子琳琅隨官軍收復

郡城而琅益病越二年卒未幾琳亦卒今存者其中子瑛

舊史氏俞樾曰余主講誥經精舍始識瑛瑛言於余請爲家傳然總兵

公事實瑛已不能言之出示履歷一紙則服官本末頗具所載戰功皆

本當時公牘尙有條理余因次第之如此乾隆嘉慶間天下承平一二

海盜出沒風濤中上煩

朝廷宵旰而將帥之臣各出其死力求稱

上意自咸豐以來中原擾攘而濱海亦日以多故君子聞鼓鼙而思將

帥何能無慨然乎古愚君以名將之孫有至性母卒廬於墓又慷慨有

大略卒死王事可謂不隕其家聲者矣故以附焉瑛亦權奇自喜將門

之後固與尋常佔畢者異乎

哈耶阿傳 吉林通志

哈耶阿姓瓜爾佳氏世居吉林隸滿洲正黃旗額勒登保元子嘉慶十
三年以雲騎尉襲一等威勇侯爵授二等侍衛十七年遷頭等
命在乾清門行走明年河南教匪陷滑縣
命與副都統格布舍隨欽差大臣那彥成提督楊遇春剿之既破道口
迎拒之賊分七路進兵偕格布舍抄擊其右因合各路克道口殲賊盈

萬燬其巢面亦被創進攻滑城賊三千餘自桃源來援擊卻之既而援賊規入城城賊二千出應隨遇春衷賊力戰殲之靡遺以功

賜號繼勇巴圖魯凱旋坐攜幼孩鐫四級調用前功改留任二十一年充奏事處領班較射中五矢

命在御前侍衛上行走授正白旗蒙古副都統尋遷武備院卿兼正黃旗公中佐領二十三年從

幸盛京坐武備院卒擅入黃布城退出御前侍衛在乾清門行走尋復故授正白旗護軍統領道光二年歷遷左翼前鋒統領四年造辦處玻璃庫災馳救甚力

賜幣

賜紫禁城騎馬六年

宣宗御含輝樓閱馬射中五矢

賜物逆回張格爾陷喀什噶爾四城

命為領隊大臣隨揚威將軍長齡勦之明年偕參贊大臣楊遇春戰賊

洋阿爾巴特莊既捷逐北三十餘里殲賊萬餘俘二千二百有奇賊復糾十餘萬眾據沙布都爾莊之險以拒我軍三路進提督楊芳由右路

而哈郎阿以騎兵繼之斬馘甚眾賊仍嚴鼓遂縱騎橫貫賊陳乃大潰

逐北四十里殲賊無算師進阿瓦巴特莊與領隊大臣阿勒罕保以騎

兵分左右會大軍合擊賊陳亂乘勢繞襲莊後獲安集延頭目阿瓦子

邁瑪底等禽斬幾三萬進渾水河賊數百人颯渡來犯擊卻之遂渡河

馳逼喀什噶爾城圍攻克之張格爾先遁獲其孥及從逆伯克阿布都

拉安集延頭目推立汗等斬級六萬俘四千有奇而賊目玉努斯尙據

和闐師進毘拉滿以騎兵北由沙山抄出賊後與前三路合擊大破之多所斬獲餘賊潰遂克和闐擢鑲紅旗蒙古都統其冬張格爾就禽明年俘獻

闕下
賜緙絲蟒袍一襲幣二端列四十功臣圖形

紫光閣

御製贊曰御前扈從心懷禦侮命中挽疆闕如虓虎率吉林兵衝鋒勇

賈精壯堪嘉望繼乃父九年充歷馬大臣坐馬未調習鑄一級留任明

年回裔復入卡圍喀什噶爾城

命偕楊芳為參贊大臣隨長齡勦之師至賊遁疏言城圍三月糧糗無

餘酌留守兵外悉令就食葉爾羌命之

命與楊芳察葉爾羌各大臣所辦理及回眾助逆情形尋疏復先是逆
回滋擾喀什噶爾參贊大臣扎隆阿疏陳回子郡王伊薩克有句結內
應情事

宣宗以事關重大

命解扎隆阿任並哈郎阿所疏伊薩克情形交長齡案鞫會長齡劾扎
隆阿任兵民妄相殺戮

詔褫職研究

命哈郎阿護理喀什噶爾參贊大臣印務疏辭不允並

詔與楊芳妥籌剿撫善後各事宜及嚴捕著名賊目十一年疏言分別
覈辦喀什噶爾附近從逆被脅回戶又東南兩路回眾先後禽送逆賊
百四十二名及偵卡外阿哈素魯有馬賊三百餘抄掠已令將弁戒嚴
相機懲創

詔嘉之其秋坐扎隆阿誣陷伊薩克前疏陳伊薩克情形草率鑄五級
留任時議行屯田資防守

宣宗以哈郎阿久歷戎行令暫留回疆辦理或駐葉爾羌或駐喀什噶
爾與長齡等審量以

續通志卷四十八

七

聞而浩罕伯克遣使求通商如故疏入

詔可因此責令縛獻賊目送所脅民回爲一勞永逸計明年遂遣使進
表送喀什噶爾回眾並領安集延貿易人及貨物馬匹進卡宣示威德
許通商免稅夷目悅服疏入嘉焉

命俟通商事定察夷情帖服於筵宴後回京其冬福建嘉義縣亂聞授
參贊大臣偕欽差大臣瑚松額剿之未至事平旋師明年歷署鑲藍鑲
白旗都統坐奏事處擅收無名封章未留其人鑄二級調用改留任十
四年

宣宗謁

西陵總管行營事務尋授閱兵大臣明年閱山西陝西軍歸權領侍衛
內大臣冬山西巡撫申啟賢疏言校閱省城營伍各弁多虛報弓力槍
礮有全未中靶者

詔哈郎阿甫經往閱乃顛預卒事如此褫都統退出御前侍衛以二等
侍衛在乾清門行走罰世爵半俸十二年既數遷至正藍旗蒙古都統
復

賜紫禁城騎馬二十一年春山海關秦王島有夷舶署領侍衛內大臣馳往協防其秋再往二十二年授領侍衛內大臣尋命在御前侍衛上行走調鑲紅旗漢軍都統二十五年以病請致仕命食俟爵全俸二十九年卒

賜祭葬並銀五百兩加太子少保銜諡曰剛恪

總兵劉公家傳

梅會亮

公諱清字天一貴州廣順人以拔貢生歷官布政使終總兵然人皆呼為劉青天從其官四川縣令時民所稱也嘉慶元年達州王三槐以教匪倡亂時公以縣丞遷知縣數以鄉兵破賊於南充廣元開公撫民及士卒皆以兒子畜之人樂為死賊自為民時知公名戰莫為用故遇公輒述

睿皇帝知之由南充縣驟遷至建昌道

賞戴花翎後屢起屢躡先是

身上賊久未平有進招撫說者試行之經略大臣念撫賊莫如公宜隻身入賊營者數返三槐遂降而冒功者詭言生得之三槐誅他賊首疑懼不出故功不時就而官兵持勦撫兩端戰不力然賊卒深信公前後

續傳卷四十八

八

降黨與二萬人及行堅壁清野議

上命經略大臣一委公賊卒由是破散捕餘匪裁撤鄉勇公功為多八年大功告成入覲

賜詩取民所呼青天者以為句由四川按察使改山西遷布政使以屬吏事責授刑部員外郎轉山東鹽運使時嘉慶十七年矣逾年而教匪朱成良陷曹縣定陶公自請從戎以官兵五百敗賊於髯山復定陶又敗之於韓家廟殺賊二千時賊保扈家集於曹縣樹土牆荆棘四周公自定陶攻其東縱火拔柵賊突出多死稍逸者南北官兵至合擊之誅賊首朱成良王奇山賊在山東者皆盡而河南賊自滑縣奔定陶者亦殲於公十一月賊平公之平扈家集也

上諭曰劉清年逾六旬且係文職能率士卒取賊巢勇敢可嘉賞布政使銜至是遂授雲南布政使旋以二品頂戴留山東鹽運使任二十一年八月改登州鎮總兵復改曹州鎮總兵

今上即位二年以疾乞休在籍食全俸七年終於家

賜祭葬

人

梅曾亮曰

國朝漢總督以武起家者岳公鍾琪楊公遇春皆是也公以布政使官總兵遇尤奇矣公軍中久坦率厭苛禮改是官未必非意所便也然復定陶時專將有功亦不能無中於上官之忌云

劉青天傳蔣湘南

孔門無兵法而有吏治有勇知方合將吏之術而一之仁者無敵之師也仁人之師生之而仁殺之而仁生殺俱仁賊化爲民故曰賊服者侯賊畏者仇不仇而侯勿侈兵謀吾於故總兵劉公而愈信之公諱清字天一號松齋貴州廣順人嘉慶中天下所稱劉青天也先是睿皇帝卽位之三年

詔曰朕聞川省剿辦賊匪州縣中有劉清平日官聲甚好每率眾禦敵賊以伊廉吏往往退避引去劉清如果始終奮勇民情愛戴著勒保據實保奏無何賊首王三槐聽公諭降而總統以生禽入告

廷訊時三槐供言四川好官惟劉青天一人由是青天之名上徹

宸座薄海內外識與不識皆以青天呼公當是時川中賊四起分青黃藍白綠五號最强者孫士鳳徐天德擾川東冉文儔羅其清王三槐擾

續傳卷四十五

九

川北各萬餘人殺劫官吏獨相戒勿犯劉青天三槐之降也本受公約束許以不死及公爲總統所賣而三槐臨刑仍稱公好官不以被給悔其深服賊心至於如此然而公殺賊未嘗不力也嘉慶元年十月敗徐天德於麻柳場二年三月敗冷天祿於楊柳坪四月敗王學禮於清溪場八月敗羅其清冉文儔於多福山逐之於碾盤壩來定寺諸處連敗之每戰必斬賊千百戰畢駐營卽單騎入賊壘曉以大義勸之降賊終以王三槐故疑貳留公宿帳中供食導閱各巢迎送拜跪均如民禮此與漢張綱討廣陵賊張嬰單車直造嬰壘者三千年來得公而兩綱之事得自主故其功卽成公之事不得自主故其功不卽成公不以王三槐之故而廢勸賊之心賊不以王三槐之故而萌害公之意戰血未乾訓語倏至出入虎穴坦若門庭見羅其清等則大哭賊亦大哭蓋不待戰而其心已爲公奪矣公嘗率子廷榛出探賊賊不知爲公噪而逐之公策馬過河陷泥淖中賊攢矛刺之已及中有識公者曰此劉青天也各棄矛泗水負公父子登岸餘賊牽馬爲整鞍轡而去故曰賊畏者仇賊服者侯侯而不仇勿侈兵謀然則川陝楚三省之亂卽以公一人定之有餘也五年夏公招降二萬數千人賊勢由此遂衰經略額勒登保

等以次勦除公復破禽楊開第高見奇李彬辛文揚布青齊國典葛成
勝等且戰且撫願歸農者皆投麾下功竣晉爵至按察使
陛見

御製詩以賜有蜀民何幸見青天之句用王三槐供中語也十八年九
月山東妖人朱成良反陷定陶曹縣勢張甚公爲山東鹽運使請於巡
撫得兵五百率奴趙升朱壽符貴閔榮王德等皆從蜀賊中拔出經百
戰者也是時民從賊者多其未揭竿者公以紅旗予之上書盛世良民
令曰勿動動則斬由是朱成良勢孤僅存四千餘人公敗之於方山復
定陶又敗之於張家廟扈家集復曹縣河南之賊奔曹縣者並殲之嗚
呼公以五百人旬日間滅賊數千過皇甫高朱倚遠矣而其妙用則在
於散賊黨且保全民命無算公之心猶是招撫蜀賊之心也仁也仁人
之師生之而仁殺之而仁生殺俱仁賊化爲民此之謂也公在蜀大小
近百戰所率皆鄉兵無異驅市人而戰之惟曹定之役乃用官兵當川
督魁倫退屯鹽亭時公料王家背灘淺賊必由此偷渡請勿撤防守兵
魁倫不可未幾果如公料魁倫轉劾公以自解宰廣元時關廂民異賊
爭入城公堅不許曰入城一步卽棄城一步令止一子今率之宿關外

續傳卷四十八

與汝等共守民各感奮遂與公共擊賊羅思舉者東鄉人橫行川楚境
有年公以計縛之奇其才釋爲鄉勇首思舉遂以軍功起家至提督每
語人曰生平知己只吾青天師也復定陶日兵不敢入城公騎馬周視
曰城有烏此空城也入宿縣麻洞開城門五百人頗自危公曰無害賊
黨眾而我兵單示之以壯賊必連夜遁是夜賊潛三十里內謀襲公究
以不測虛實而遁公之膽識大率類此卽以將才論亦足與古名將爭
雄千古而況又能爲循吏耶

本朝用漢官沿明制文武不互受職破格用者趙公良棟父子岳公鍾
琪父子梁公鼐劉公世明楊公遇春皆以武轉文

睿皇帝知公深

特授爲總兵官以文轉武功名之盛躒諸公而上之非

睿皇帝不能如此用公非公不能如此受

睿皇帝之知夫天生奇才必破常格以待之而後得盡其用才奇而格

不破是天猶未欲盡其才也公之才奇

睿皇帝之知公奇自知縣以至布政使皆破格以從民望凡投首之賊
被脅之民堅壁清野之議熱河刑名之司無不

特旨命公卽南山餘賊戕李植德一事且有劉清本應治罪姑念平日官聲暫從寬免之

御製詩曰空羣羨爾超流俗其

簡在豈偶然哉余嘗求公遺事以爲公仁人也其所以服賊者在政事不在兵謀必有州書縣譜昭其生平大事及考諸傳記聞諸故老殊多未具然亦足覘大概公初至蜀攝大竹縣丞民有訟債者賒貸家獻金賂公求不直子錢家公計其數抵所負之半陽許之升堂出金斥賒貸家曰汝賄官何如償債令更出其半以完母而令子錢家讓其子立予判結兩造各感泣南充故脂膏地公於法錢外一無所取故常不給民爭以酒米爲壽公擇其尤貧者受酒一杯米一龠崇慶州俗悍匪毗輒殺人公導之以情教之以禮風蒸蒸變廣元天荒久公延名宿課士公餘自教之不數年甲乙科相續有入翰林者熱河舊無都統嘉慶十五年新設並設理刑司鉅細草創定自公手如謹圍場分稅界文武舉劾蒙漢交易皆歷久遵行而刑名尤明慎蒙古男女亦皆呼青山山東鹽政疲公不受陋規清其積弊商人紆而課以中程登州海中有物嘗食

續傳卷四十八

上

營馬兵將每苦之公莅任爲文禱海怪遂以滅曹州河隄屢廢於水公倡築之手植柳一株令曰汝等其視此柳民亦爭各植一柳一日種柳盈萬隄遂以固選童子四十人教以兵法日練之曰此兵成他日無足當者春秋行屬縣靡村不到爲男女講

聖諭廣訓稿以銀牌紙筆環而聽者日千人他府民亦走百餘里來聽講故事總兵餐錢出於虛糧公自甘淡食而以虛糧予兵去任日兵民送數百里不忍別餽食物者皆慰謝之一老婦奉雞卵十枚強納輿中曰吾寡婦也不可卻公下輿勞之乃受鳴呼此青天之名所由來也公長身噩立風度凝然御物無陵岸親疏皆以家人畜之政如春雨不回枯不已以故所泣處施無不宜今夫天之生才無古今有治亂孫吳白韓足以亂亂而不足以治治龔黃車魯足以治治而不足以亂亂治治者循良爲一書亂亂者兵法爲一家雲蒸龍變文武分途孔明仲氏合而一之以有勇知方爲都三代以後降才非殊至於公而後孔門之效乃始不誣公生時太夫人夢飛熊入帷故小字夢熊三歲失恃事繼母篤孝兩兄爲析產構訟公泣而勸之讓以己產訟始息及公以乾隆四十二年登拔萃科不能入都兩兄感公義各賣所讓產爲治裝嗚呼此

青天之名所由來也青天者仁仁者孝弟也有子曰孝弟爲仁之本孫子亦曰孝以仁爲本未有不孝弟而能合循吏名將一以貫之者也民以爲侯賊不敢仇宜哉宜哉公以

四庫館議敘得縣丞籤發四川署大竹縣丞補冕甯縣丞受知於總督孫士毅升南充知縣調廣元東鄉署崇慶州嘉慶三年

賞戴花翎以同知直隸州用四年經略勒保奏擢忠州直隸州知州加知府銜升建昌道以賊渡王家嘴降知縣六年經略額勒登保奏

開復建昌道七年升按察使自嘉慶三年以後皆在軍營未履任也十年入

覲

賜御製詩十一年丁繼母憂十三年服闋授山西按察使升布政使以巡撫事逆欽差大臣大臣旋署巡撫公自劾才不勝任請開布政使缺睿皇帝斥其冒昧署巡撫亦以臨晉事劾公降爲員外郎十五年補刑部山東司員外郎充熱河都統衙門辦事司員十七年升山東鹽運使十八年平曹定教匪

賞布政使銜並玉鞬荷包十九年授雲南布政使仍留山東鹽運使任

二十一年乞病

續傳卷四十八

主

睿皇帝不許回籍病愈授登州鎮總兵二十五年調曹州鎮總兵道光二年與巡撫議裁兵事不合部如公議公遂乞休

命在籍支食全俸八年卒於家上聞震悼官其孫熾昌兵部主事瑩舉人祭葬如例山東四川民爲公建祠無數十二年奉

旨入祀山東名宦祠貴州鄉賢祠二十四年熱河都統薩迎阿率司官鮑繼培姚近寶奉公主於夏典史舊祠祀之蒙漢人民大和會縣祠額四字曰如見青天

論曰公習苦出於天性所官無不裁陋規者大府不以爲然故有州縣有餘方面不足之考公於是不樂居方面也戰功見於章奏者多與人共遺命子孫勿爲行述碑志其高致豈後世賢者所能及哉

又書劉松齋先生軼事 蕭湘南

今天下士大夫以及蚩氓無不好談劉青天事者事隔三十餘年談者不無傳聞之誤所可據以爲憑者國史館傳也而姚鼐作方敏愨公傳末云今史館大臣傳率鈔錄

上諭吏牘謂以避黨讐毀譽之嫌而名臣行蹟遂不得見以此爲私傳之不可廢況松齋先生勳名半在軍營其勦撫並用之法洵足爲後世則軍中奏牘之體不能件繫故史館傳中亦不得而詳書余旣爲公作家傳後復得當時幕中人所紀諸本言公撫賊法甚具因筆而錄之以補傳之未備登州海神獻柱事信而有徵亦並附著庶天下傳者不至久而愈誤云

劉青天之名自公爲縣丞時始及宰南充縣而名已徧川中矣嘉慶元年達州東鄉妖賊起總督檄公從軍理糧餉公見官兵屢避賊乃募鄉勇五百四十人自成一隊賊素易官兵每戰尾而笑詈之及遇公輒敗再戰再敗賊首羅其清冉文傳頗怪異之曰此誰何竟不畏死者公覩賊出掠直衝其巢斬首千餘級賊退守方山坪坪高萬仞難仰攻賊又下木石雷轉公思出奇計遣探兵袁華謀其山後華被獲告賊曰我劉青天所使也賊始知死戰者爲劉青天因以禮待華曰藉汝報劉青天伊愛民清官我等不忍與戰但事須面稟請伊明日來坪上公次日率羅思舉赴坪賊聲礮隊接跪供酒食無敢立語者公勸之降賊曰茲事體大恐非翁所能主公慷慨自任賊許以三日復命公乃與思舉返而東鄉已於是日爲王三槐所破殺都統佛住羅冉二賊爲三槐要不果降此公第一次招撫余於道光初晤羅公於京師聞其親述者如此後見唐永勤所紀本與羅說合而近人書有謂羅其清舊受公恩且謂公拔營宵遁賊遣百餘騎禦而追思舉者皆誤也

公怒羅冉二賊之背約也必欲生禽之以思舉知方山坪徑令率前鋒擣賊巢而賊已先下令曰吾負劉青天此後遇劉青天不可戰以故望見公旗輒避去公屢逐不獲因回攻徐天德天德王三槐黨也陷東鄉後三槐出掠以天德守豐城寨時東鄉無官總督令公攝縣事公與羅思舉火藥攜入賊巢深處散綫草木聞而自揀大樹蔽其杪候賊息熱之公伏山下望火鼓而大譟賊驚起不知所爲奪路自相殺踏崖死者無算天明公登山已無一賊覓思舉不知所往思舉實酣眠樹上久之始徐徐下

白號賊目王學禮乃賊首徐天德之舅也公設伏禽之將因學禮以繩天德學禮亦言諸賊皆可降公請於總督率學禮詣徐天德壘並詣冷天祿王三槐王作經孫士鳳各壘嘉慶二年四月十六日也諸賊鳴礮出接供酒食公宣示招撫賊唯唯旣而曰爺雖能作主我等仍要親見

大帥公許之約以十八日到大營是夕公宿賊帳中諸賊首以次擊刁斗衛公次日歸十八日王三槐等八人至紅豆梁遲疑不敢前公馳往迎之總督不見川東道李憲儀見之稿以牛酒令繳其兵八賊叩頭期三日畢繳臨行憲儀曰汝等免死宜推擇同夥者預備正法諸賊出咋舌曰劉青天不能作主我等投誠無望也公知憲儀失言賊必中變令將雙廟場戰馬匿他處並設伏以待憲儀不可公更遣幕友劉星渠往諭之賊已出五千人乘夜來劫馬幸馬已匿僅焚場而去

王三槐等之初降也本信公許以不死及聞李道有預備正法之語而後意變然終不以公爲欺故各賊相約不與劉青天戰大帥因令各路兵皆張公旗公亦卸糧務專領鄉勇勦賊賊被各路兵追急亦往往反鬪與公值無不敗者公率鄉勇千餘人勇首桂涵李子青麻鷄子等尤驍勇殺賊最惡賊於石壁土粉書大字曰劉青天劉青天與你無讐又無冤不識時務將我趕我若拏住你叫你喊皇天公見而駐營卽隻身造賊壘傳語曰劉青天來賊開壘跪接仍不敢害公王三槐感公誠所以有二次之降

王三槐旣被禽其黨半歸令天祿半歸徐天德故川賊以冷徐爲最悍

續傳卷四十八

十四

再川東川西川北羣賊蟻起狡而善謀者惟冉天元數敗諸大帥公與之戰於渠縣大敗之追至淨邊寺中伏兵四起公單騎走賊首大呼曰生禽劉青天者賞賊眾不敢施銃礮公因得脫還

川賊之起也巴州東鄉達州通江南江諸處習邪教者尤眾然有子習教而父不習者有兄習教而弟不習者故賊雖突竄往來而經過桑梓無不歸問家事公訪知其情因住營要害夜勸晝撫凡著名之賊有父兄子弟在家者遣人厚結之賊有投誠意則潛令圖其賊首苟文耀之戕苟文明鮮文炳楊似山之殺鮮大川皆公謀也立大旗上書

皇恩浩蕩投誠免死八字令人持至賊寨前勸之復令降賊射書與所親曰現在劉青天辦理招撫我等已冠帶榮身爾等休執迷不悟空遭誅戮後悔何及賊中轉相告語無戰心公率鄉勇乘夜攻之遂以次瓦解

解

鮮大川巴州人爲藍號賊首頗知兵法前隊回首後隊刃之官兵畏其死戰不敢敵其羣從鮮文炳鮮路保及僞先鋒楊似山皆勇而有謀公至巴州與知州田文煦密議厚卹鮮文炳楊似山家兩人感公恩願效死公令文炳說大川降如不可則因而刺殺之文炳乘間言大川大川

果疑文炳招楊似山入帳議殺文炳似山遂斬大川首付文炳提潛山洞而率所親與羣賊戰鮮路保報公公統鄉勇援似山別令王茂才等接文炳巴州之賊從此遂盡公獻大川首於將軍德榜泰將軍賞騾二疋而未入奏公欲官楊似山亦未能似山願從公剿賊次年三月戰於廣元之三家壩中斃死

公所降共二萬七千餘人其有業者遣歸田里無業者令爲鄉勇有業而願從軍者亦登鄉勇籍後立功有名者苟崇勳苟文耀李彬辛文李世玉趙文相皆僞元帥也張登岸張登貴何成龍鞏貴孔傳世李世壽王敦忠傳敏德鮮其壽郭成盛皆僞總兵也伍玉龍羅萃然張儒萬陽吳青陽何悠然邱高金言朗司家忠樊國壽蘇登科牛永大苟新兒皆僞參將都司也凡三十餘人皆

賞戴藍翎苟崇勳卽苟文通某大帥奏稱臨陣殲斃者其實非也投降後公爲名曰能新屢立奇功又易名曰崇勳
嘉慶六年大功將竣公奉大府檄凡投降之賊不宜再留營致濫軍需公念諸賊田廬已焚蕩驟散之勢必復爲賊將蔓延益不可治因不領餉而自犒之所到處富戶商人有可貸者皆給以券諭帖一至百餘里

嘉慶八年撤鄉勇之令既下公所率向一千二百餘名皆降賊經百戰者也其中桀驁無歸者潛萌異志天陰道瀟藍翎弁海察督促過急八月十六日闕於南江縣之長江場戕海寮叛去者五百餘人公方飯於廢寺中聞之召未去之七百人立而諭之眾跪泣曰從大人血戰數年

慨然響應以故事平後公之逋負不下十萬
恩如父子一旦捨去殊不忍言已放聲哭公亦泣下曰此國家功令非我甘捨汝等汝等歸爲良民勝如從我也幕友唐永勤飛騎追二十餘里招五百人還公一一安慰之任三日從容遣散公幕中多奇士劉星渠唐永勤其最著者

公之蒞登州鎮也以蓬萊閣爲防海要地自宋代以來久廢不修倡議修之所屬紳民各踴躍輸金三萬餘時但爲蓬萊閣未及
大成殿也需巨柱四不時得將遣人浮海購諸關東黃縣有富人丁樹蘭者家治屋取大木於勞山召工師卽山成之候海潮至由海而轉於

黃忽海風大作漂其五入登登人歡呼以聞公量其周徑惟一柱不合然不知爲誰家物也公令張示傳知夫柱家予以值逾日丁樹蘭至不受值而鑄其柱於是用四留一以待他用閣工既竣贏金萬遂議新

大成殿殿拆而一柱朽折其丈尺正合所留之柱遠近因喧傳以爲海神獻柱云

沈勤毅公傳

董沛

沈烜字再中一字午亭浙江鄞縣人生具二齒舉家駭甚有識者曰此異相也他日必非凡品年十八以騎射補武生二十從軍隸浙帥麾下由哨司累擢千總安南盜寇內洋閩人蔡牽倚爲援勢張甚烜從浙帥累剿之嘉慶八年戰定海徐公洋傷於胸血溢不止力疾自奮獲首功擢溫州中營守備九年戰盡山洋遇颶壞船浮水面躍登他舟擢溫州左營游擊會安南新易主恭事中朝盡反前王之轍而救境內毋藪盜盜聚於粵洋眾至數萬廣督聞諸

朝求可以統水師者請選於鄰省部以閩浙諸將第其名聞

仁宗知烜才朱圓其姓名命署廣大營參將烜抵粵從潮州鎮總兵石征火烏從南澳總兵征郭婆帶每見戰輒陷賊陣粵兵素懦見而駭之烜警以軍法眾悚然懼顧鮮烜遇兵厚士遇傷親視湯藥多方治之陳亡者厚爲之殮哭盡哀然後請卹一軍皆服擢春江協副將百總督齡倚烜如左右手屆期當入

續傳卷四十八

共

觀而以粵東事亟奏留之烜謂總督曰兵強斯戰力亦不在多殺也盜豈有不惜命者畏我戰則我降耳今廣東水師遠遜浙兵盜所以無畏也爲將領者誠能嚴敕所部約束如子弟每臨陣躬赴敵以先之別募選鋒作其敢戰何患於不勝而亦何患於盜百齡首肯大治兵廣州以烜分統之十五年督新練兵出海道斬賊千計又用火攻沈其船盜賊曰粵兵固易與耳何戰之力也於是盜始懼而百齡亦嚴守關隘杜內間盜無所獲鄭乙妻以萬餘人林阿發以三千人皆啟關降獻大小船四百艘銃礮甲仗數萬計

詔嘉百齡首功予世襲輕車都尉烜次之

賞戴花翎及四喜玉搬指鼻煙壺等物調海口協十六年百齡督兩江

奏以烜自隨

命鎮蘇松十八年

陸見

仁宗問往日兵曾受傷乎烜以受傷對

命解衣審視其處問已愈乎對曰愈矣

上親撫摩之蓋異數也時李文成反滑縣直隸山東同時告警

上諭烜江南疆域錯齊豫雖係水師亦應統兵赴徐州助百齡守境毋使一賊逸入烜遵

旨馳赴淮北以一軍屯馬良集賊不敢犯十九年正月凱旋九月丁內憂二十一年除服入都面奉

諭旨向在廣東著有勞績卽授陽江鎮總兵二十三年擢廣東提督粵濱於海汊港多諸巨寇雖就撫而一二小醜時出沒無定所烜嚴檄管內分路勦之將吏以俘囚獻者無虛月一二年中內外晏如而烜亦老矣道光二年引年乞休

宣宗允之旋由粵入

覲

命謁

昌陵在籍支全俸烜還里數日而卒年六十有六遺表聞

子祭葬如例

賜諡勤毅長子承恩以一品蔭生知雲南陸涼州

楊勤勇公事略

元度 國朝嘉道中漢人戰功之盛推兩楊侯爲最一忠武公遇春一則勤勇

公芳也勤勇公諱芳字誠村貴州松桃廳人生而沈毅有幹略好讀書

通經史大義應試不售遂入伍充書識忠武公一見賞識之拔補把總

時川楚教匪稱亂官兵征之累歲不能靖公從忠武勦賊每戰輒爲軍

鋒斬馘不可數計累擢台拱守備

賞藍翎嘉慶四年經略額勒登保公進剿賊渠冷天祿包正洪於大竹

適正洪已與儀隴賊合竄鄰水乃冒雨突擊天祿於岳池楊公遇春以

勁騎二千一戰殲之進追至石筍河賊以五舟迭渡僅濟千賊餘賊數

千方臨岸登舟時公已晉都司率九騎越山先至卽麾幟大呼馳擊賊

隔山不知我後隊虛實爭赴河陷淖者三千餘人五舟皆覆隔河賊呼

號不能救俄大軍至騎浮而濟并追殲其先渡之賊是役公功稱最

賞花翎擢下江營遊擊五年閏四月賊渠楊開甲張天倫等趨渭南公

隨楊公倍道扼其東竄并遣兵守商雒賊議復西竄留張漢潮餘黨三

千於後以綴官軍公扼西河口去路而大軍三路偪攻連破之大小中

溪斬首千五百賊合竄溪口伏兵四面蹙之溝水盡赤生禽千餘人張

逆餘黨戮焉公由兩廣督標參將晉廣西副將

賞誠勇巴圖魯名號八月連敗賊於成縣階州賊渡白水河入老林公

冒雨追賊及之於磨刀石刃十餘賊予傷足墜馬仍徒步殺賊復傷臂官軍乘之大敗賊射傷伍懷志

上聞而嘉之

詔問受傷狀下所司優敘六年五月張天倫與曾芝秀陳國奉等率眾六千合屯高唐嶺公及楊公分路擊之禽斬三千賊復分爲二公夜襲天倫於白河俘馘殆盡楊公遂與公邀擊冉添元於平利克之六月經略偃賊入川爲一舉埽蕩計八月遣公擊張天倫於西鄉俘斬盈千餘賊僅四百竄老林適公前所追太平開縣之賊竄至南江經略令公殲東奔之辛斗於通江而自帥楊公追西竄之高見奇魏學盛於廣元禽斬殆盡七年三月楊公移勦苟文明賊自華陽合而東竄公分路追截敗之於是楚賊略殄盡其南山遺孽經公及楊公分兵十餘路櫛比排搜亦所餘無幾矣逆渠苟朝九被公勦急遂與宋應伏合竄漢南爲官兵所殪八年六月公窮搜至老林匿賊百餘突出盤屋洋縣公追之入山八月有散遣之勇附之合三百人苟文潤領其眾勢復猖獗九月通江已散之勇五百人復與合遂戕副將朱槐於山溝

詔公回漢北專防山內餘賊時賊皆百戰之餘忽陝忽川忽聚忽散

續碑傳卷四十八

騰兔脫無定蹤九年正月屢由安康窺漢岸圖竄南山皆爲公所卻先後禽餘匪百餘於是南山無賊八月公搜漢北餘匪盡殄之各路皆報肅清公擢甯陝鎮總兵初嘉慶五年特設甯陝鎮節制子午華陽黑河諸營汛以從征鄉勇五千充新兵地險兵悍爲漢北第一巖疆九年三省戡定經略參贊先後還京師十年七月而有新兵之變時楊公遇春以陝西提督入

覲公赴固原署提督事副將楊之震護甯陝總兵營卒陳達順陳先倫以停給鹽米銀事糾眾叛戕副將遊擊賊黨蒲大芳等以公素得士心先護送其家屬於興安而後歸從賊楊公行至西安聞變卽調兵進剿詔德楞泰爲欽差大臣討之賊奔華陽破洋縣虜脅數千公帥固原兵二百人馳抵石泉九月賊攻孝義廳分隊窺子午峪公馳扼峪口德公令楊公以兵五千自洋縣進剿而自帥兵四千繼之賊攻鄂縣公復馳救力擊劫營賊麀戰竟夜身受數創犁且賊辨其爲公也自引去時賊黨已增至萬人又選步騎三千爲前鋒改推蒲大芳爲首遇楊公軍於方柴關兵賊隔河尙有相揖訊者及戰數合殺傷略相當大芳陷陣力戰伏賊繞出陣後官兵大潰楊公僅率親兵數十登山斷後賊追至忽

反走乃收潰卒扼方柴關次日公馳至謂楊公曰叛兵皆百戰之餘驍悍習地利而官兵勤勞九載瘡痍未復且與叛兵多同功一體之人以兵攻兵終無鬪志賊兩戰見吾二人皆辟易尚有舊部曲誼請公按兵緩攻而某單騎入賊營曉以順逆楊公然之時賊矛林立或叩馬力阻公曰我與楊公計之熟矣天佑蒼生我必不死爲

國息兵卽死且得所何恨遂策馬前萬眾怍愕公故得新兵心又捍鬪善操縱見大芳等卽痛哭曰吾與若曹戮力數年同患難生死今對壘如仇敵吾不忍見若曹罹族滅禍請先殺我於是眾皆哭逾二日大芳誘縛先倫達順以眾降德公遂以叛卒窮蹙乞命奏首禍二百二十有四人盡釋歸伍

上切責其寬縱命戍降卒二百餘人於新疆尋爲伊犁將軍松筠公所誅楊公降總兵公坐馭兵不嚴釀變劾戍伊犁德公旣劾公恐物議不平復密疏申雪公至伊犁未卅月卽

賜環命以守備千總補用十三年回籍省親補松桃協千總十五年起廣東右翼總兵入覲

續碑傳卷四十八

九

賞還花翎尋調西安鎮總兵十六年丁母憂十八年秋林清謀反旣伏誅李文成踞滑縣

詔陝督那彥成公爲欽差大臣帥師討賊提督楊公遇春副之公呈請效力奏補河北鎮總兵隨楊公敗賊道口鎮遂圍滑文成突圍出奔太行招賊四千據輝縣之司寨那公遣公追勦公伏騎白土岡誘賊出戰佯走伏起大敗之又追擊於南首山殺賊二千有奇是役也賊走山上殊死戰官兵畏賊鋒有退者公拔佩刀立斫數人眾效死遂大捷進奪司寨文成縱火自燔死乃合力攻滑時滑城未下而陝西三才峽賊又起滑城堅外磚內土中沙大礮攻之遇沙而止官軍掘地隧皆爲所破公陽築他棚進攻而潛掘舊隧滿實火藥至期將卒皆甲騎以待十二月十日平明西南城崩裂十餘丈官軍奮前奪城蟻附人巷戰至夜共殲賊二萬免老幼男婦二萬有奇俘首逆牛亮臣徐安國等檻送京師滑縣平加提督銜

賞雲騎尉世職十九年春帥師入陝大破賊禽逆目譚貴等詔優敘調漢中鎮總兵二十年擢甘肅提督道光元年調直隸三年調湖南五年調固原六年回首張格爾反楊公遇春時署陝甘總督

詔授欽差大臣帥師討賊尋以大學士長齡爲揚威將軍楊公爲參贊公請行許之時賊陷西四城距阿克蘇八十里十月大兵集阿克蘇賊扼柯爾坪地險要中隔戈壁將軍令公襲破之焚其南北莊敗其援師七年二月師至大河拐賊三千來襲營敗之進抵洋阿巴特沙漠平曠賊二萬據橫岡五六里公與將軍參贊分三路進攻賊據岡下壓者再大兵分路奪岡賊披靡禽斬過半盡得牲畜糗糧濟師進抵沙布都爾回城多葦湖樹林賊數萬臨渠列陣決水成沮於使騎兵不得騁城後林中皆有伏賊難繞襲公先令步卒冒險越渠短兵接復麾驍騎繞左右淺渠橫截入陣賊大潰追逾渾水河三十里俘馘萬計復分敗林中伏賊及河橋援應賊越二日賊數萬據阿瓦巴特回城依岡背河我軍距賊十里止營夜遣吉林勁騎千分探左右閒道繞出賊後次日壓賊壘而軍賊佯退誘我兵登岡而反乘之我兵鎗礮迭前藤牌兵虎衣躍入賊馬驚陣亂岡後伏賊起殊死戰而我千騎已繞出回堡後突擊其背賊大敗奔禽斬各半殫安集延二酋目追至洋達瑪河距喀什噶爾城八十里次日整隊至渾河北岸賊悉其眾十餘萬背城一戰阻河爲陣互二十餘里築壘橫蔽之穴壘轟礮鼓角震天勢張甚公遣死士數

續神傳卷四十八

宇大

百夜擾其營謹覘達旦是夜西南風起撼木揚沙大霧晦將軍以賊據形勢且眾寡不敵欲退屯十餘里須霽而進楊公持不可公意與楊公合乃遣索倫千騎繞趨下游牽賊勢公與楊公率親兵驟渡上游據上風礮勢與風沙勢相搏賊陣亂比曉我兵盡渡風止霧霽乘勢衝入賊陣賊土崩我軍乘勝抵喀城時三月朔日也張格爾先遁獲其甥姪及僞汗並伯克等斬馘數萬十六日公以兵六千往勦和闐賊破之禽斬逆酋玉努斯遂復和闐加騎都尉世職

命在乾清門行走時楊公亦連復英吉沙葉爾羌二城六月公與將軍參贊帥師八千出寨掩捕楊公屯色勒庫公屯阿賴阿賴者蔥嶺之脊脊以西水皆西流乃喀城赴浩罕之道也有浩罕賊二千餘誘官軍入伏鏖戰一晝夜眾幾殆公步步爲營嚴陣出險

上責諸將孤軍采入

召楊公入關以公代爲參贊十二月密遣黑回出卡縱反聞言官兵全撤喀城虛諸回翹首以望張逆果率步騎五百欲乘除夕不備潛襲喀城公與長公嚴兵六千以待二十有七日賊潛至旋折回公率兵星夜追至喀爾鐵蓋山擊斬殆盡張逆僅餘三十賊奔騎登山副將胡超都

司段永福等禽之八年正月捷聞

詔封公三等果勇侯

賞戴雙眼孔雀翎

賜紫韁黃馬鞋加太子太保

賜其子承注舉人圖象紫光閣漢大臣以公爲首

御製贊凱旋

命郊勞行受俘禮勒碑太學及喀爾鐵蓋山

上召見數次晉侯爵二等晉太子太傅銜

賜紫禁城騎馬復以公六十生辰

御書酬庸錫羨額並福壽字

賜之九年秋安集延夷匪復肆掠公與長公馳至軍檄諭浩罕復許入

貢通市十三年四川清溪土千戶越嵩山各夷滋事調四川提督公至

夷已平定乃妥籌善後

詔嘉之晉一等侯十四年夷復蠢動降二等侯以總兵往甘肅候補十

六年湖南鎮守兵變迫脅鎮道借銀累萬起公爲總兵定善後章程五

則皆如所請十八年遷廣西提督調湖南二十一年海氛棘

詔宗室奕山爲靖逆將軍公與尙書隆文並爲參贊大臣由江浙至廣

東以議款罷兵公回湖南提督任逾年請告歸

詔在籍食俸二十六年薨年七十有七遺疏聞

優詔褒卹賚白金五百兩治喪

賜祭葬如例謚勤勇公結髮從戎經百戰戰必躬先士卒所向未嘗挫

衄屢荷

恩賚所得玉鞞荷囊不可勝紀少受楊忠武之知執從子禮甚謹威望

與忠武埒天下稱二楊而公受侯封且先於忠武八年論者謂二楊勳

績高天下而尤以招撫甯陝新兵稱首何則南山起隴西尾商郎阻輿

千餘里據川陝湖之腹而甯陝所治五郎形勢要害又據南山秦嶺之

腹新兵五千皆百戰之勇習流賊故智使招撫遲數日賊已分突秦隴

楚蜀殘良民老師糜餉曷所紀極然非公威信服人奮不顧身入賊穴

亦莫能追數千出柙走險之虎兕使歸就閑勒也孫子曰全軍爲上破

軍次之公雖以此獲咎而功德所被無涯矣公兼資文武負著述才所

著有平平錄等書凡十餘種

又記楊誠村軍門事

張琦

道光元年十二月誠村軍門延余課子暇則談軍中事輒隨錄之前後不復詮次昔歐陽公喜史遷能傳節烈奇士而怪今無如遷所紀者吾得軍門事記之幸甚不知後之視吾文抑何如也

滑縣之役高杞署河南巡撫那彥成爲總統公擊賊道口鞭巡撫吏人巡撫大怒盛氣與總統言楊某欺我公直入帳總統迎勞曰喜得道口矣公遜謝公知杞情故激之謂曰道口幸得然公頃誤甚杞曰吾何誤公曰賊勢方張公挺身前賊幾撲公而吏士不相救護尙不當鞭耶公死某等敢不死公輕死無益於

國又累某等某方恨公公乃更怒耶杞笑而罷時總統有兵七千屯城東西南三面杞有兵七千不肯發會楊提督遇春因退縮摘參將某頂帶杞又怒欲以二千人往屯濬縣總統將許之公曰不可許也總統曰此公不曉事吾將俟其去而揭之公曰公揭杞杞亦將揭公此兩敗也賊將誰辦且公與某皆伊犁罪人

上幸赦而用之今又樂往乎一身不足道如老母何總統曰杞欲去奈何公曰某能止之且收其兵但乞花翎紅頂各一可總統許諾公卽馳至高杞營先語其用事者二人曰汝二人禍福在吾其知之乎二人者

發碑傳卷四十八

愕然曰何也公曰高公欲去濬縣汝二人之過也構怨大臣罪當死吾能證汝吾今阻高公毋去以花翎紅頂相贈此二途將何從二人者唯唯乃入見杞曰公欲往濬縣乎曰然人多欺蔑吾者吾故避之公曰有上旨乎曰無有總統札乎曰無公曰賊在滑公乃去濬公今日往總統明日揭公矣杞曰然則奈何公曰何不以六千兵與某而公坐享其利杞曰汝欲奪吾兵權耶公曰公擁兵不發總統奏請公圍北門公能前往耶北門賊之衝也一朝失利公受其禍不如以兵與某有事責不及公而有功固不能不歸之公也又何疑乎杞悅公遂領其眾

李文成之竄司寨也圍未合時潛至桃園官兵不知復往山東糾其眾至是北出乃覺之或謂賊止二百餘人總統命公以三百人追勦公一日夜馳二百數十里過輝縣西三十餘里遇賊四千餘公兵少且疲引避之令眾北走自率二十人南趨林麓中賊乘之公力戰且走賊悉眾圍之公率二十人衝圍無一傷者久之卒稍稍集僅七十二人有桑都統者謂公已死大哭見公至乃喜曰顧今將安往公曰離縣十五里南營門有村落可舍也已至桑公請往輝縣公曰輝縣城小兵單吾來時不敢開門一相延接今兵敗而往其肯納耶吾以七十二人居城外賊

大夥來身死城破矣不如舍此賊必疑不敢來公必欲往卽將眾去誓死此耳桑公乃不復言然懼甚公曰村後河流寬廣村前岸高可作偃月形必上流有閘可放水也探之果然乃決閘放水環村如濠眾心乃安公益請新調甘肅步兵一千關東馬兵九百而自往湯陰迎之凡五日兵乃集公鬚爲之白而李文成遠以足創劇據侯兆川司寨堡公未至司寨二十里時方早餐命下營駐此眾請撲賊寨公不應曰暮又請公又不應夜五鼓眾復請曰此來爲擊賊也今賊近咫尺而一日夜不進律以逗遛罪公能任之吾輩不能也吾輩亦領兵者將獨出矣公乃命四騎往曰速召賊來吾擊之四騎相顧默然公曰往視賊當齊隊汝則罵之彼當來令二騎還報四騎既往密令步兵伏於隘馬隊伏於右側賊果以一千人來方度隘步兵猝起賊驚返走馬隊遠而蹙之斬獲殆盡方賊之來也別有賊千餘緣山逕出期上下夾擊公預令十人登山伏約賊至則鼓比至十人者鳴鼓大呼自上馳下賊潰竄走山谷公以八騎追之過一山梁奄遇賊數百人踵至公令騎下馬坐梁上賊近發大石下擊賊退自相壓擾亂乃上馬衝之大眾亦至又大獲是日也賊二千餘人僅有逸者日晡遂進圍司寨堡堡堅厚賊守禦嚴公慮

續神傳卷四十八

三

吏士不得息又恐賊乘閒衝逸乃度堡後隱處安營帳俟暮夜令卒士更番賊不之知明早力攻不下令卒負板潛至堡下穴其牆半日而牆壞積土如坦坡遂登其堡而以鎗礮下擊賊自焚死生禽二百餘人於積尸中驗之得李文成屍送總統大營殺賊破寨凡兩日實嘉慶十八年十一月二十日也

嘉慶六年十一月公率鄉勇三千勦南山賊過華陽營值大雪軍士嗟怨猝然起反戈相向左右大驚公仰天笑不止軍士怪之勢稍定矛戟上指公徐召頭人謂之曰若輩何乃相戲頭人曰士寒甚銅帳未具故欲還耳公曰軍士昨有言此乎曰未也今始行時言此乎曰未也公曰汝早以告卽不發矣吾豈不卹士卒者顧已在途制軍在後烏可以返前去六十里止宿任留數日耳眾遂行至二郎壩宿令查造意者遷延不報公已詗知之明且從容步行至村口坐召一旗人畢至問之曰有昨日造意者乎眾曰無公曰無卽去黃柏園宿已備犒人各肉一斤矣一旗畢行又召一旗問之如前至第八旗令某某二人者留餘眾悉前行乃斬二人以首徇眾士帖然

嘉慶十八年十月二十六日公至滑縣大營二十七日奪道口十一月

初三日得高公杞兵遂圍北門時桃園賊距城北三十里內外合勢公接戰數日旋掘濠植柵以困之初九日總統命追賊首李文成二十日破司寨二十五日回大營先是何副將格都統於城之西北及東面潛穿地道將至城公視之不法法請更穿之總統曰君破司寨勤苦至矣宜可少休公曰滑城堅昔人以八萬眾攻圍四十日不下今兵才萬五千耳攻城無善策地道不如法賊將覺之徒費工力今更作之賊必不虞假令知之更爲疑道則功可成豈以勞乏辭乎固請乃許二十八日於城西南隅掘之尺許卽見水不可穿乃以布囊土成夾道上覆以板漸逼城距三丈許賊以大木巨石擊之不能前遂於三丈內穿之比至城而前西北及東兩道爲賊所覺無所用至是賊又覺之以碑石下擊道復壞公命於南更作故令賊知備而密於北斜穿之每進以厚板支四面如屋度已達城下復轉屈橫穿二尺如門更進爲大坑實火藥其中以土囊塞門藥發而城遂崩十二月初十日也是役也何格二公爲地道四十日不成公以十二日成焉又揚言於賊吾以地道進期初十日破城賊果於內掘濠以備之而不慮其用地雷之法也公招降者三賊不應宋某者賊首宋元成之子司寨所獲者也使招其父及牛亮

續碑傳卷四十八

西

臣二賊欲降而徐安國倔強不從遂已至是城破公令軍士登其城毋下擊悉令婦女童穉出城禁吏士標掠而自坐城缺處視之三日乃盡有紳士四人自言非賊予四旗令招被脅者二百餘人悉縱之公又言地道直穿有定而斜穿難準以羅盤定之鍼旋轉不已或教以卷席如筒接之達口外鍼始定蓋氣得泄故也然數尺之口不能泄氣而數寸之筒反能泄氣斯理之不可解者

嘉慶十一年七月六日甯陝新兵變公時署固原提督獨龍夫人在知將有變使謂署總兵參將楊之震曰米折兩月不發洶洶將反速借給以安其心慮有他者吾家當代償也之震曰眾兵恐我耳烏敢反且釁非由我何懼不聽更以威脅之眾益怒先是頭人陳先能陳大順等請見曰吾輩將反願受大人恩至重願送太太去乃發夫人以義曉之且曰汝等造反而先免我疑知情無以白且我一婦人去何爲甯死此耳揮眾出外委王清山公之親隨也賊令入衛又分數十人守大門約餘人不得入而公前所釋教匪二百人爲之室家者知有變悉入守中門曰願以死報是夜賊遂殺參將及中軍遊擊城守營都司焚南北二城鎗礮號哭之聲不絕婦女多從睡夢起知賊不犯鎮署多就避廊室爲

之滿比曉陳先能等又請見召之入叩頭請太太行曰吾等已反勢不能止將出糾徒眾恐後來者驚太太夫人曰既爾可命轎來夫人憐眾婦女不忍棄令前行轎在後百姓擁之者數百人賊傳呼擺隊賊在五耶城者悉來夫人叱之始退賊凡送二十里至石泉縣縣令陳君聞警惶懼民人驚竄者眾至夫人來賊不敢偏請夫人留而總兵王兆夢至夫人謂兆夢曰甯陝兵二千餘非盡反首事者百餘人耳速馳諭令縛頭人來事可定兆夢怯不敢往夫人留六日乃之興安兄太守龍君畧云夫人之行也署中物不暇顧後四日石泉民請往取之門洞開闕無人而一匕一箸無失者十一月新兵既就撫蒲大芳等二十人不自安白公願往接夫人公知其意欲推誠待之即遣往夫人方乳公子未滿百日即抱公子乘轎行中途蒲大芳與其徒王鳳爭刀傷鳳手是日宿漢陰夫人命借官刑具坐中庭召蒲大芳罵曰汝反叛幸宥不死更弄刀杖又待反耶杖之百加桎梏焉從者惶懼終夕未至甯陝二十里十人偕蒲大芳固請乃釋之葉都司自發語余曰時有廚役朱子勇者爲賊所怨夫人匿之複壁中夫人已去子勇入上房攜銅盆出遇賊將殺之子勇曰太太命取盟具汝殺我汝自齎往耳摔銅盆於地賊信之

得免

藏神傳卷四十八

五

余前聞龍夫人事頗參錯今乃得實夫人時年二十四使楊之震聽夫人言則亂可弭也而王兆夢又怯懦不敢前致賊橫決豈亦有數存耶又夫人謂公曰事雖定然當有遠行公曰何至是且已革翎頂而復又何慮夫人曰

朝廷事自有法度兵叛大案不容無任其咎者非君而誰已而公果遣戍伊犁後公自四川返貴州或勸帶鹽可獲利三千金已積之舟畔矣夫人曰以氣機觀之未必能享多金盍卜之公卜不吉遂辭焉行六十里過黃瓜槽險灘舟幾覆載重者皆溺嗚呼豈獨膽異人哉其才識固不可及也

南山縣互千餘里有名之谷七十二老林密箐窮巖峻谷深澗巨壑鳥道猿逕在在而是無藉流民結棚墾植其中由來舊矣川楚匪徒恃以爲藪凡經剿敗竄迹伏匿莫可究詰明中堂永總統及他鎮將以此得罪者不可勝數論者比之核桃瓢云嘉慶四年經略額侯奏設甯陝鎮勦入山之賊俾各帥專力於外分十營兵六千名即以安插鄉勇爲善計規模未立而任甯陝者屢以事去六年公之鎮築城堡建室屋編營

伍分汎地設官募士卒與勦賊並行期年草創初定而兵糧無本色月給銀三錢謂之米折仿鄰鎮陝安例而以陝安有本色六之五祇兩月折色今南山爲賊所蹂躪食物昂貴無以爲活咨撫軍量給本色撫軍以無糧可撥乃月給四錢後年餘部駁不準並追扣所加額俟復奏四錢仍不敷乞給五錢部議姑準三年後物價平督撫再議十一年六月三年滿應另議而藩司五月始詳未奏六月遂不發米折兵丁以爲未定者所加耳原定三錢何乃扣眾始諱矣而撫軍有包穀之給先是山北饑南山包穀大熟奏請采買備振五郎同知張某者領銀五萬兩春賦於民秋收之石價銀五錢凡買十萬石至收時價貴至一兩民間斛又大倍於官以故不肯交且曰前領價吏強與之同知怒吏因緣爲暴眾鬪然起二千餘人圍五郎城勢將變公令中軍馳往召眾諭之更與石五錢事乃已至是撫軍以五郎餘穀接濟照石一兩扣價是時包穀賤且陳不可食兵心益不服七月六日變乃作撫軍聞變適楊提督遇春入

覲過西安偕赴甯陝率省兵一千五百名北至賊已入山於是收甯陝兵未叛者六百人西駐城固公在固原十一日得撫軍咨冒雨行以三

續碑傳卷四十八

矣

卒自隨中途答撫軍書略云速發米折以安未叛之心嚴堵隘口以杜遠颺之道如能以身息事某之志也至邠州知賊西竄已破城汎數處有出蓋鄂各峪之勢改道麟遊趨山逕兩甚數阻水陷泥淖中八月一日夜半抵城固而是日賊破洋縣殺縣令曾彰泗官兵阻細水河不能救公既至撫軍出密紙呂大文等三人姓名卽遇春所收未叛者曰獲叛兵云三人欲相繼爲亂公曰叛兵欲除此人耳此三人必不反撫軍未信明日公以甯陝兵六百人屯漢王臺召呂大文三人侍左右三人知見疑故咸感泣公偵賊在龍亭欲往賊中曉以利害不許公陰遣人告賊目蒲大芳授之計賊趨石水犯石泉公請以師援撫軍終慮新兵反側不可恃令陝安鎮王兆夢赴之後一日公又請往撫軍猶以爲言公曰甯陝兵六千叛者數百人耳若盡疑新兵是教之叛也以甯陝兵勦甯陝賊有咎吾自任之乃許至石泉登城一騎迅至城下曰欲有言公識其爲賊目董學孔也縋之上問賊中事曰賊大眾將至公遣左右悉去令學孔執長刀侍頃之賊大眾至遙見公各頭人棄軍城大哭前跪而賊首陳先能陳大順遙立不敢近公曰汝等尙識我耶自作孽乃敢造反念與汝共甘苦久不忍見汝等駢戮早自爲計縛首逆來悉活

汝否者董學孔安知非汝刺客可卽殺我伸頸以就學孔學孔涕泣不能視公曰既不殺我卽自爲計來者吾待之如學孔決不疑目視蒲大芳王奉等示之意適別賊攻黃州會館將陷公呼王奉吳占先起速赴解圍二人往得免賊大眾退西竄迎風壩初公傳檄賊中令斬首逆先能大順懼不欲降蒲大芳畏其徒眾不敢發思奪其權先能自石泉而西大芳以所掠騾馬載帶創賊數十人而已徒步與返五郎眾竊議曰陳先能爲帥不卹吾等蒲大芳愛我宜爲帥三請乃許由此蒲大芳始與先能貳矣公慮賊分難制陰令先能而漸併其眾是時德楞泰侯爲總統辦賊至漢中檄公安輯甯陝毋出勦公之鎮撫難民修城堡招餘兵得二千居鎮城七日而德侯檄公出勦初賊之起不過百數十人轉輾裹掠糾聚及遠近匪徒附從者遂至數萬知公在鎮城乃掠而東破土木坪犯孝義將出商洛公遣兵援孝義賊以爲公東來又折而西出大峪口祥都統禦之爲所敗賊乃西公率甯陝兵千人出子午谷大雨水失鍋帳無算知賊已西追之暮至鄠縣賊攻圍急城將陷適省中送馬八十匹公以步兵營城東而以騎隊衝擊矛觸公臂洞焉賊不知公之至以爲西安兵來分眾撲營士卒皆力戰比曉賊始見公大驚狂

奔鄠縣圍解九月七日也是日奉

續碑傳卷四十八

七

旨摘去翎頂德侯劾公避難就易故也軍士大譁公切諭之裏創復進至斜峪關奉德侯檄止急追是時撫軍駐城固德侯屯鳳縣楊提督遇春營方柴關十九日公至方柴關而遇春以八千人敗士氣沮喪公既至蒲大芳遣人乞降公進至平木各大帥皆以兵會鋒甫文公出陣前賊皆下馬環跪乞降而頭入數十俯塵號泣亦有爲公執轡依依者而後賊矛手數千倔強有欲鬪之色公曰汝等懇誠欲降可退屯數里明日吾自來受降賊捲撤勢甚整而爲公執轡者十數人竟隨公不去宿帳下焉是夕也各營戒嚴公念賊驍健經戰陣眾益多破三城十九營汎生民荼毒已甚誅其渠魁宥其脅從則事可甯息必期盡勦勢將奔潰四出勞師糜餉不可以日月計川楚匪徒其已事也而各帥多狐疑不可與深言黎明公出營遇提督遇春問之公曰往見賊遇春曰賊不可信公曰移營前進試察之遇春曰我當偕往並轡行二里許賊數騎來迎公遙見之止遇春而前賊曰馬步全夥皆排隊俟矣公曰蒲大芳何不來曰在後集眾公令賊前導行遇春止之再三又遣騎扣馬力阻公曰爲我謝提臺死生命也勿我惜天佑蒼生我必不死爲

國息兵死得所矣遂馳往三里許過小溪賊馬隊二千餘跪西岸齊唱叩接大人公馬就溪飲眾曰大人勿懼不敢傷大人公笑曰馬飲耳何懼飲良久眾跪不起察其意誠無他變按轡行眾俟公過乃上馬自後擁之進二里許蒲大芳來曰集步戰手三千人陳先能奪去行矣公慮先能既奪眾去或將復來乘我腹背受敵乃勒馬定曰陳先能不降汝等前聽吾言於是身後二千騎悉轉而前公諭以

朝廷恩威父母妻子皆當坐罪後言與汝等勤勞南山五年飢寒生死情同父子今不惜一身以活汝等眾皆俯泣願降公曰既降即縛陳先能來眾曰諾三四十騎驅去公曰各大帥念我我去明日復來乃馳還而遇春猶立馬俟見公大哭曰爲

國效命吾意與君訣矣公亦泣至營蒲大芳縛陳先能獻各帥稱慶遣何某查取賊數而大順忽反側將殺參將參將逃歸言狀各帥色變公曰蒲大芳必能縛來無慮薄暮蒲大芳果又縛陳大順來獻二逆竝獲而各帥咸恐事中變已聯銜稟德侯各爲功名計公力言無他不之信明日公再至賊中蒲大芳已除館俟矣公謂之曰汝禽獻首逆率眾投誠厥功炳如爲我約束眾士給令箭解佩劍予之願歸業者悉予資給

續神傳卷四十八

天

遣散是日查願散遣者二百餘人送大營資給之縛傲慢者一人公遂宿賊中蒲大芳等侍戶外夜半喊聲起鎗礮齊作公念吾在賊中官兵無劫營理必叛民與民匪互鬪假寐俟而蒲大芳數十人慮他賊爲變拔刀以待約曰來者即斬頃之聲漸息大芳私語曰大人睡熟幸不聞明日公命大芳查前隊願歸業者而所遣二百餘人約予資給者糧臺暴之奪其資裝僅不死賊中聞之前隊悉走公率賊眾追之三日至西江口斬民匪首逆五人賊大眾悉聚公召頭人與眾約示三條且曰不願降者不强當各資給以明我舍生相救之意吾散遣降者畢即移兵剿之必盡殺明日集大眾登臺受之叛兵悉降初公陰使蒲大芳合其眾毋令散至是眾益多大芳不能合將四出微公推誠招之勢潰決矣公入賊中五日各帥不知公所在遇春憂懼或以言激之益恚怒嘔血數升德侯知事平移營西河口距公營十里給路票遣散者三千八百餘名仍歸伍者二百二十四名飭公帶回甯陝而附近南山徒眾未領票散者不計數云十月初二日以鄂縣功

賞還二品頂戴十二日以截殺匪徒功

賞還花翎是役也古北口提督薛大烈在軍中德侯令面奏情事大烈

攘爲已功又奏甘肅逆回案總督李侍堯拏問提督剛達發伊犁今甯
陝兵變宜有處分於是公發伊犁後撫軍以新疆換防爲名派兵千人
蒲大芳等二百餘人與其中至伊犁悉爲將軍松筠所誅

續碑傳集卷四十八

續碑傳集卷四十八

三

武臣二

江南徐州鎮總兵古愚裘公家傳

劉鴻翔

江南徐州鎮總兵裘公諱安邦字古愚號梅林浙江會稽人祖父皆不顯以公貴

贈如其官公少食貧與諸兒以力相角禱於城隍兆日上馬金下馬銀難買英雄一片心乃從軍隸溫州鎮麾下是時蔡逆聚無賴數千人出沒洋面劫商船官兵進則沒入外洋退則復出剽掠公以匕首插鞞中乘小舟直抵賊艘為之陳順逆禍福數蔡逆曰以爾材質不能為

國家出力乃作賊為滅族計乎且古今有白首賊乎蔡色沮集眾謀投誠眾懼誅弗聽公取賊所劫紅毛國酒二瓶以還一軍見之皆驚公由是知名入武庠嘉慶辛酉浙江中丞阮公元主武闈見公問蔡逆狀勉之曰爾異日

國之干城也中式武舉第一壬戌會試後選兵部差官乙丑成進士欽點藍翎侍衛三年期滿發往江南以營守備用署徐州中營夏鎮汛

續碑傳卷四十九

守備補青山營守備調江甯城守營守備署徐州城守營都司軍政卓

異擢江甯城守左營都司調青村營都司升海州營參將

賞戴花翎旋升總河督標中軍副將

特授安徽壽春鎮總兵調徐州鎮總兵公狀貌魁梧奇偉腰大十圍能

彎百石弓馳駿馬如飛望之者目為神人巨盜滑賊鹽梟聞風竄匿然

公自都守洊至總戎前後二十年計所禽獲猶數百名

國家承平日久將士頽惰兵革朽鈍公所至必精器械汰老弱曰安用此以糜

國帑造擡礮兩兵肩一能打二百弓每合操旌旗鎧甲鮮明照耀雲龍

山色轟聲與黃河濤聲俱震雷迅電閃蛟鱷遁藏故徐州鎮兵勇冠江

南公雖武人喜讀陸宣公奏議談吏治至民生疾苦多泣下初守夏鎮

汎歲饑盡出所藏以待餓者沛令勸富民振弗應公一言立應任青山

營海州營遇救荒亦然余來徐公去夏鎮已久百姓猶謂自裘公去無

公道事余謂沛令曰一守備使民不忘如此作長吏者能無愧乎余以

事至海州宿逆旅逆旅人猶說公當年終夜不倦鎮壽春徐州祿入漸

豐盡用以給鰥寡孤獨冬月施棉衣貧不能殮者施棺木公一出皆擁

拜馬前創立義學教兩鎮子弟講武之暇與文士雅歌投壺以爲笑樂故兩鎮之士民莫不畏公之威懷公之德懷石之詞至比晉之羊叔子今年四月早余偕公禱雨公忽不至翌日知公疾越七月初四日疾革時湖南逆獠初報捷廣東八排蠢動公生平以效命捐軀自矢太息曰大丈夫不得戮力疆場報

國恩乃如此死乎言訖而卒年五十九

論曰公鎮壽春時使工畫其像歿後余莫拜始得見英姿肖其生時如在千軍萬馬中公自刻苦自奉人所不堪得疾製桐棺布衾遺命薄葬史曰武官不惜死文官不愛錢則天下太平如公者可謂兼之矣

襄總兵詩記王效成

襄總兵安邦鎮壽春日取韎韠之士教之卞射馳逐健騎者拔老而疲輒嚴汰之士曙則集牙門下伺練至暮更宿無少媮暇日講明恩義申警條教月給糧芻費無豪髮剝士入視異時特豐顧又平久軍人習惰恣多兼他末藝以自潤不利於其私又諸黜籍者胥怨噪以數與民事故文僚亦滋不悅大吏以不便地方調徐州去去之日土民送之北門外手觴以薦咸有依依色而羣童稚從焉蓋其所設義學軍貧子弟也

續神傳卷四十九

二

總兵顧送者謝曰勞諸君良苦武官無能利諸君第歸爲慰安若長者各自愛行且語懷出一紙曰無以答厚意以斯爲別念蓋二詩云壽春俗故頑悍市多游手覲利隙輒出刃相恐詐不則戕之訟殺者日續其射數之戲自一至四藏其一占中者報三倍不中輸進法曰壓寶翼准而西俗爭嗜之壽春益甚無虛市巷叢什伯連宵且露挺刃備劫鬪犯死不顧總兵至嚴諭之每燕服出潛察遇惡徒立捕責之總兵貌魁岸多力人懼之無敢格市寔無懷刃者游手遁易商民得安業故父老於其去追思之總兵鎮官也校卒伍糾暴慝猶爲勤其職耳讀其詩音辭嗚緩若自謝其寡諧無幾微悔愠之意何其定也日三餐而不負者有幾獨懇懇於天人之際抑知道者耶假置諸牧令其於生民何如也往讀祭征虜傳史稱其克己奉公賞賜盡與士卒所在吏人不知有軍取士皆用儒術常雅歌投壺竊心尙其廉威而有學而惜不並時接之今其果不異也否耶里人自其地歸述其事若詩詩有少忘誤爲綴數字而存之總兵嘗閱士至泗多責夏楚未嘗輕杖人絕饋獻食惟湯餅豕肉其年殆四十許蓋行未艾也將以徵諸後聞

附原詩

屈指瓜期未一年恩恩馬首又東遷幸無涼德傷陰德賴有心田作
硯田我意但知憐赤子此身常恐愧青天從今莫道清如水尙受人
閒飲馬錢

道左頻勞惜好官坦然宇宙此襟寬明知同俗和衷易早識中流獨
立難贏得清風攜兩袖敢教終日負三餐行行珍重攀留意海角天
涯一樣看

觀將軍傳

姚瑩

荆州將軍觀公喜本名觀音喜後改今名字吉蘭陝西駐防鑲白旗人
嘗從征大小金川及白蓮教匪立功道光二年代音公登額鎮臺灣余
方被議罷公以臺人愛余引爲兄弟交數從問事余竭誠告之上元葉
公以臺灣道再遷爲閩撫建言臺灣戍兵驕悍費繁無用請出臺地召
募

上命與總督議之閩督慶公未議罷去葉公兼督篆檄公議改公以問
余余言其不可且爲說以上公善之寢其事未幾葉公罷去趙文恪來
督閩浙軍遂定議仍如舊制四年春公以疾歸陝五年起鎮眞定入覲
上猶問臺灣戍兵事公面對制不可改且陳召募之害甚悉

續碑傳卷四十九

三

上嘉納以公知兵擢爲杭州將軍七年移荆州九年正月入覲數

召見寵待有加

賜紫禁城騎馬四月回鎮尋病乞歸八月卒公歷戎行久所至訓練士
卒甚勤勵而各營驕惰成習皆憚公之嚴也公每語人曰某武人守職
惟知操兵養馬而已不知其他又以臺灣戍兵事得自余言逢人輒稱
述之其讓善如此數以書問余所急在臺日嘗助余以千金代償官負
有古人之風焉

阿勒罕保傳

吉林通志

阿勒罕保姓鈕祜祿氏吉林人隸滿洲正白旗嘉慶二年隨副都統賽
冲阿征川陝楚三省教匪戰竹葉關克露風坪禦賊五郎廟並有功名
年擊賊黃壩驛進攻東家坪又敗賊三岔河尋自秦嶺繞出華州邀賊
賊大潰克華陽壩進大神山遇賊敗之賊竄風銅鋪躡擊殆盡以功

賞藍翎累擢侍衛十八年直隸長垣教匪擾及豫東

命直隸總督溫承惠爲欽差大臣勦之疏請阿勒罕保隨往尋以逆匪

擅入

禁城

命暫留京師協捕事平遷二等侍衛赴軍既至新鄉進攻司寨率精銳直搗賊巢多所斬獲冬進攻道口賊出拒而桃源援賊復至分兵擊之並潰擢頭等侍衛在

乾清門行走進攻滑縣會諸軍拔之獲賊目徐安國俘斬萬數事平加副都統銜坐回京攜帶幼孩鐫四級調用

詔改留任仍在

乾清門行走二十年授鑲藍旗蒙古副都統明年

駕幸圓明園途有逸馬驚出御前侍衛職在扈

蹕未卽前截坐褫職

詔降頭等侍衛在大門上行走俄復在

乾清門行走加副都統銜充伊犁領隊大臣二十五年授正藍旗蒙古副都統道光二年充十五善射六年逆回張格爾倡亂以領隊大臣率黑龍江官兵赴軍剿之明年遇賊洋阿爾巴特我軍分三路擊之殲賊幾盡大軍戰沙布都爾莊以騎兵張兩翼涉渠抄擊賊驚潰陳斬賊目色提巴爾第俘械無算戰阿瓦巴特回莊賊憑沙岡以拒又以騎兵由岡右襲之賊敗斬賊目二殲賊三萬

續碑傳卷四十九

四

賜號壯勇巴圖魯喀什噶爾城旣復張格爾先遁而賊目愛瑪爾阿里玉努斯等猶據和闐揚威將軍長齡檄往剿之取道雜古牙爾遇賊毘拉滿分兵夾擊大敗之和闐平復授伊犁領隊大臣長齡疏留冬偵知張格爾奔喀爾鐵蓋山率軍自阿爾圖什躡之賊棄馬登山大軍窮追弗舍獲之山巔明年春齎捷奏馳報京師

命在御前行走授正黃旗護軍統領圖形

紫光閣

御製贊曰索倫勁旅特命將之驍捷前鋒四城星馳火槍善戰躡蹤窮追超出賊背國之熊羆九年調鑲藍旗滿洲副都統以較射失儀革御前侍衛仍在

乾清門行走秋扈

幸盛京坐有馬闌入布城鐫一級留任明年較射

宣宗臨闕中六矢仍

命在御前行走秋安集延回匪不靖隨大學士長齡赴新疆察辦十一年回京坐失察馬甲呢莽阿教習鐫三級留任十四年以年老退出御前侍衛尋乞休未幾卒

汪道誠傳 江西通志

汪道誠字勉旃樂平人嘉慶十四年一甲一名武進士授頭等侍衛福建詔安營游擊擢泉州城守營參將總督趙慎畛薦其才進署督標中營副將旋授福建協副將總督孫爾準再薦之擢直隸天津鎮總兵尋調雲南鶴麗改浙江處州權浙江提督未幾擢雲南提督騰越南甸夷刁承緒結野夷倡亂屢挫官軍道誠馳剿之禽賊渠治如律在官六年積俸治田歲以所入爲士卒婚喪賞卹費牒總督刊石記之以老致仕子食半奉卒諡勤果道誠軀幹奇偉頗通兵家言嘗創六合長矛陣有圖說藏於家

福建海壇鎮總兵官鎮海倪公神道碑銘 徐時棟

咸豐八年十一月鎮海倪公子澧以先狀來鄭言於其友徐時棟曰先公備位總戎例得樹豐碑載揚嘉績而不孝隨侍日淺不獲悉數其成勞始末且夜負疚遞今餘三十年顧其時海上功級與遷除歲月惟不孝尙知百一二雖不備子爲我文之以詔後人敢再拜以請乃者時棟克葬我先大夫公子實勤之而未之報也先德之紀其奚辭按狀公諱起蛟字安瀾又字翔雲其先居衢州倪家橋元大德閒有慶甫者官慶

鎮海傳卷四十九

五

元路教諭始占籍定海慶元路後爲甯波府而

皇朝改定海曰鎮海故公世爲浙江鎮海縣人曾大父廷宰縣學生大

父文魁父士達隱德不耀兩世竝

贈至武顯將軍大母馬氏母吳氏竝

贈夫人公以武生中乾隆五十九年

恩科舉人明年試進士不第效力本省嘉慶九年補溫州中營千總明年署台州黃巖營守備其年九月入浙海盡山洋追土盜張阿治忽颶風大作船破皆死獨公倉遽中得片板飄入日本界明日順流還視之甯波之石浦洋也始緣岸而上得生是時壯烈伯李忠毅公長庚方奉詔統水師征海盜蔡牽檄公往閩海同擊賊牽以百餘艘犯臺灣沈舟鹿耳門拒官軍忠毅集總兵以下攻之公冒矢石力戰旣而牽奪門遁結粵盜朱濱入古鎮洋公乘兵船追擊之進擊之於泉州張坑洋又追擊之於金門返埕洋斬首七十三級殲其魁陳炳獲其船三禽盜目回瑯以下十六人十二年復擊盜於定海之漁山追之至披山外洋奪舟三斬首三十級獲其魁陳角劉永郭英俘餘盜九十七女盜一是歲忠毅歿於軍閒一年而牽敗海盜平於是調公爲温州玉環營守備十七

年遷溫州左營遊擊明年調中營二十年母吳夫人卒二十四年擢江
南吳淞參將明年調松江之川沙未幾擢京口水師副將明歲道光元
年署壽春鎮總兵十二月奉

上諭授福建海壇鎮總兵官余嘗綜公事狀見公爲守備者凡七年七
年之間斬馘獻俘沈船破賊其功足以膺懋賞而未嘗有一階之晉一
命之寵至乎寰海晏定無可表見而歷歲數遷終建節鉞嗚呼豈不以
末弁微秩苟不能事上官卽不易以戰功達

帝聽而其異日之卒邀顯擢者雖未必無奇勳偉烈爲子孫不及知抑
亦曩者銳身報

國付死生於鯨波鱷浪中功績終不容泯沒天故以追酬之即有志之
士但觀於公亦可以自奮矣公狀貌魁偉少好談兵及壯精將略治軍
嚴而威愛交濟能得士死力其守備玉環也歲大稜饑民羣起圍廳署
同知皇急請用兵公曰是激之使亂也單騎慰撫之皆散走爲條議荒
政不妄刑一人而事定兩任總兵皆捐俸買義山以掩骼骼其官海壇
也慮海中捕盜或妄誣良民乃白總督請飭各州縣凡買船入海盡於
篷上大書其郡縣姓名以是賊蹤無所混而奸商悍漁亦不敢事剽掠

續碑傳卷四十九

六

前後總督並嘗以公名入奏曰材長技優緝捕向前曰明習水務訓練
有方蓋未足以盡其長云道光七年六月十四日卒於官享年五十有
八配同縣陳氏累

封至夫人公始從戎泊用兵海上十餘年勤勞於外不返顧家室仰事
俯畜賴夫人以紡績措持之官玉環之明年始挈眷之任及開閩海壇
復命夫人率子女歸里公卒教遺孤成立始終婦道未嘗以貧賤富貴
移其心也後公二十二年卒年八十子五人男三嫡長秉紀以國子監
生試於鄉更名灃次秉樞又次秉彝

成皇帝登極推恩中外灃當以蔭得官吏曰公甫以副將擢總兵得蔭
可正二品可從二品灃白於公曰是殆欲勉兒爲貴耶也辭不受女二
嫁營把總鄞縣鄭鼇鎮海縣學生邵槐灃以道光十一年十月朔葬公
於鄞縣明堂隩之陸家山越二十年以陳夫人耐掩封且固礱石乞辭
余旣據狀表大略如右抑聞之父老當公始學騎射時公兄持不可且
曰吾家世力田而仲乃欲以功名顯非家之祥也一夜使公巡稻田己
私偵之月昏黃見田中燄燄火光起奔跡之有虎方酣臥大懼而號而
虎亦驚醒人立審視之公也由是聽公所爲而別異財籍少所分與曰

仲且富貴焉用是區區者公既貴積俸餘奉兄以及其弟治私第成亦兄弟共之又嘗以本身應得

誥命貶贈兄爲武翼都尉蓋非常之人其來有自固不得以前史所記爲怪誕而求忠臣於孝子之門未有內行無足觀而外能致身報國者嘉慶朝諸將若羅將軍之割股與公之讓產雖以比古名將奚作耶爰再拜而銘之銘曰

交河之村光政之里篤生偉人奮興而起兄曰不可我世農夫先故未貴將喪厥家鬼神表異火光熊匪虎曠野迺公田中茫茫天風莽莽海島破帆折檣斬賊如草海上七年亦聿勞止靖海策勳佚公姓氏東南底定有

詔總戎天鑒不遠以報曩功公曰噫嘻豈繫臣力臣兄實開俾無墜職維孝維弟作忠之先萬古臣則視我表旣

祥康傳 吉林通志

祥康隸正藍旗宗室也嘉慶十九年由宗人府七品筆帖式署主事道光九年累遷光祿寺少卿授歸化城副都統署綏遠城將軍十五年歷

遷黑龍江將軍調吉林將軍先是盛京將軍奕經等會奏奉天圍場查

續碑傳卷四十九

七

禁鳥槍並沿邊防範各章程

詔吉林圍場一律查禁疏言吉林旗人素多打牲爲業除嚴禁私槍並私造外恐不肖旗人或將本身鑿字鳥槍租與雜項丁民則偷打之弊仍不能盡絕應飭各該管官查察吉林圍場原設卡倫十四道傳遞籌隻而派差查圍官兵與坐卡弁兵並不互相呈報應遵此次章程覈辦至嚴禁借給奸匪口米一條吉林圍場北邊係通京大路農民稠密如有偷打牲畜者本家即可密備口米雖有腰牌並無邊隘查驗惟有曉諭附近圍場旗民人等凡攜帶鳥槍斧鋸形迹可疑者不准賣給口米再奉天圍場與吉林圍場毗連之處以伊通河爲界西岸奉天設那丹保卡倫東岸係吉林伊通卡倫其間只隔一河巡查自無疏脫毋庸另議防範

允之

命查閱山西陝西營伍坐未能整飭降盛京副都統明年署吉林將軍時以雙城堡地方有錦州等城旗丁私赴耕作

命查明具奏旋疏雙城堡京旗房地分定進數均有界址錦州等城旗丁私行來堡謀食其充丁者係頂任地丁並無占礙嗣後請每年由熊

岳副都統飭諭錦州等城該管官造具細冊咨各該衙門隨時稽查分別咨覆以杜牽混

詔行之既久難保無內地民人潛往該堡影射牽混應嚴查禁止十七年卽真二十年伯都訥副都統巴雅爾劾私令闔省官兵攤銀幫貼進京當差官兵十名歲人二百兩

命回奏疏言前據十旗協領等稟稱吉林進京當差之員人地生疏度日拮据擬每年按名接濟銀二百兩俟二三年安居得所卽行裁撤所需銀兩於通省官兵按俸餉多寡捐資幫助恭查

聖駕巡幸盛京吉林官兵隨營當差皆係通省官兵攤助見所挑送官兵並伊等桑梓骨肉且每人所費無幾遂咨行各副都統衙門亦皆願照辦理疏入部議坐應疏

命以藍翎侍衛充庫倫辦事大臣令署將軍祿普等查明所攤扣各兵丁餉銀於庫貯項下按名給還所墊銀兩令祥康追賠二十二年以足疾乞休

許之明年卒

潘德奧

八

參贊公拜都氏諱鍾昌字汝毓一字仰山滿洲正白旗人內閣學士兼禮部侍郎諱伊湯安之第四子也委稟亮特七歲能古詩歌年二十五成進士改庶吉士散館授刑部主事先是閣學公司臬貴州公侍養之餘留心獄辭輕重出入豪髮必洞澈及官比部劄斷平反精審冠其曹長刑部者倚若左右手除員外郎有盜

天閑馬者既伏矣公察其辭色詰之曰汝知盜御馬罪死乎囚悟呼曰賄吾者謂罪不至死乃妄服耳公釋之同列皆懼無何獲真盜者乃大服嘉慶十八年林逆亂定良民有誣誤公鞫得實卽縱之全活數百人公在刑曹久不掩其文學名復由郎官入翰林爲侍講侍讀旋爲侍讀學士道光四年大考二等選少詹事擢內閣學士兼禮部侍郎七年八月出爲盛京禮部侍郎未一月入爲刑部右侍郎

上欽卹慎刑以公練習律格使佐司寇公遇疑獄必反覆推究分判昭

合凡司寇之屬才足錄者采其言薦其人以故庶司各竭慮治事無

冤抑刑曹稱得人公嘗署戶兵工三部侍郎然治獄有重名每直省疑

獄上必使公往鞫之再使山西一使福建一使雲南首尾一歲餘舟車歷

天下大半所過省會郡縣大獄皆經公審擬爲定讞焉初使山西與江都史侍郎致儼偕定平定州知州引斷失當門役得贓失察罪再使山西與蕭山湯尙書金釗偕定猗氏縣令勒罰致人死及教諭典史得贓罪歸未十日而往治福建獄福建閩縣令張騰者歷虧庫金偵外臺將劾之遂摭辭揭督撫款請入告辭連佗守令及在籍大吏獄初起閩全省官震動公與湯尙書鞠之謂督撫門者實索金宜科罪如律督撫失察歸部議餘悉張騰誣

上悉依議且益器公能十年三月還京復與德州盧相國蔭溥審勘包衣間散蒸檢案案結則又與六安楊侍郎繹曾往治雲南獄途經河南貴州鞠御史劾奏者河南則蘭儀縣城工及通省捕務義學驛站馬匹州縣虧空貴州則察密夫役情形公局幕友劣蹟所至親訪輿論覈實入奏中外稱允貴州荔波縣倉斛久做縣令不請更吏役以稱納米弊雜出苗民藉藉控訴公察吏役五人無首從發極邊前後縣令歸部嚴議苗民大和九月至雲南定騰越廳生員誣控罪還京途次定湖北都司誣控本管罪其年六月湖北江水潰隄民流亡萬計守令不能籌振救公以使臣上請得允其知大體能行度外事如此其佗審定疑獄事

續碑傳卷四十九

九

多不具書十二月還京明年二月以吏部左侍郎兼右翼總兵京師五方鱗萃豪猾隱伏公搜抉積弊卸苞苴杜請託聞者憚之營兵多虛冒公執簿案名遷轉必視射優劣邏者必獲真盜乃行賞刑盜必如法諱盜者必痛懲或謂公副金吾耳毋乃太峻公不顧益持正不少阿都下肅然月餘出爲馬蘭鎮總兵論者悅焉至鎮巡所轄者謂地遠林密竊民易攘竊非所以昭嚴重酌復總巡舊規立梭巡法每月外火道分番巡者改四番每番兩翼同日東西交踵而至與總巡會二十日而更前二番歸伍卽後二番續之內火道十八撥及五關汛皆如之南北邊則分六段梭巡十日而更得

旨依議宵小遠遁在鎮少事閱軍民子弟無教育地遂捐貲建蘭陽書院并建義學三文教蔚然又謂標兵騎射不入式復籌款設八旗騎射所遴選教習官爲養馬資訓練議不果行十二年正月除倉場侍郎上方嚮用公行有日矣會

景陵購房牖遺火迹未報被議降四品京秩七月

特簡科布多參贊大臣加頭等侍衛銜往科布多爲唐興中府地出長城六千里在烏梁海西地奇寒親故爲公危公正色曰昔阿文成公嘗

官此土今吾甫鐫級卽蒙擢用
主恩如是當電勉圖報邊地寒恆事耳
陛辭之日

上溫諭再四公頓首謝抵任慷慨賦詩以趙營平自勛逾月竟中寒卒
年四十有八海內士大夫聞公訃皆怒然涕洟爲
國家惜此才也

上嘗謂公政事文學無不敏贍故文武兩途兼倚毗之嘗爲
國史館協修

武英殿纂修
實錄館總校纂修

玉牒館副總裁
咸安宮總裁稽察中書科事務稽察左翼覺羅官學戊子科江南正考

官乙未科拔貢

朝考讀卷官公悉心校閱宿儒皆折服復爲鑲白旗滿洲副都統正白
旗蒙古副都統及鎮右翼鎮馬蘭參贊科布多皆武臣重職也公性好
墳典詩文雅健入古以主持風會爲己任所得多知名士退食之暇請

續傳卷四十九

業唱酬無虛日周行天下愛土若渴苟有文采甄賞不容口居家篤於
倫紀太夫人病亟刲股以進及卒一慟絕良久乃蘇與兄布政使繼昌
弟主事岳昌友愛肫至垂老如髻卅布政公先鎮馬蘭承修

寶華峪工應賠帑三萬兩旣殤公身任之家故貧弗卹也先娶佗塔喇
氏繼娶佟佳氏皆先公卒繼娶宗室氏子三長宗貽工部筆帖式次宗
佑舉人次宗康出嗣伯父孫一培英幼

贊曰公文獻世家少負遠志每讀史至忠毅鯁亮之臣輒感慨奮發思
與比肩願雍容郎署及文學侍從且十餘年甫內躋卿貳外總戎事遽
隕絕域恫矣公以葺桂之性痛疾前古媿嬰小夫不出肝膽治事及公
歿論者乃嘆公希古不順時坐此失要津然公受知

聖主愿膺簡任其所設施固已暴白於天下矣其不登台鉉天也於公
奚損哉

甘肅甯夏鎮總兵署和闐辦事大臣署甘肅提督史公墓碑

錢儀吉

公諱善載字叔輿別字松舟姓史氏其先自京兆杜陵至壯侯居溧陽
其後遷鄞又遷餘姚明隆慶中又寄籍順天今爲宛平人自壯侯至公
五十八世祖考振常公早世祖妣節孝沈庶祖母王同心撫孤以有立

是爲公考牧庵公諱謙以閩鳳山尉遭林爽文之亂城陷不屈死之時公妣陶前卒公先奉父命慎護大母日以委汝矣赴難弗及震慟不欲生方是時百姓爲牧庵公義斂殯於縣堂逸囚數十人槍刃翼被奉太夫人公子走臺郡以免寇烽鳴張一日數警又奉節孝之福州糧絕又從其族人於弋陽賊平

詔褒死事之臣公得廕雲騎尉及引

見故事當出隸督標公獨被

高宗旨留京營學習京營有世職自公始繇守備累官至南營參將清

操遠度不競不絀境治咸肅

大駕春秋歲事常從屬車癸酉秋畔民闖入

宮禁

仁宗自行在旋蹕公先路清塵嚴殿捕匪黨九門方戒嚴公言於步軍統領索綽羅公請開城便民以安眾心仍徹巡密詞匿賊者罔赦如言事定時論稱焉統領以是知公數引薦數年間擢中營副將軍政一等又以陸路總兵舉公德器凝定每應變如平時

上尤稔知公

登極逾月卽拜甯夏鎮總兵之

命至則嚴紀律除戎器補佚馬練部曲而厚勸賞擡轍之制火器至捷

公創爲之遂以入奏尋

敕下各鎮皆用其法尤善卹士卒因知其材否夏惡怯勇獎拔皆允其

任回疆五城陷公以楊忠武檄帥千人西討始搃守庫車之沙雅爾揚

威將軍至調隨營統吉林索倫兵爲前敵繼又以糧運將不集委公爲

翼長總後路督運駐第九臺巴爾楚之生地莊冰澌已濫路絕公於第

十一臺衛阿拉克池北得沙岡處伐木開道十餘里道通運以無阻和

闡大臣死事奏以公署理並偵緝玉努斯逸匪時所過村堡大抵空無

人有獲者反復訊無從逆迹卽釋之先余帥步雲斬所獲者將入告邀

公連署名公謝曰子之功也固言之卒勿署公處事以誠而性仁讓雖

懸軍荒外不易其素守如此和闐城被焚回民畏役四遁公先張示具

言使者所以勞徠安集之意速歸無恐則葺垣墉勸屯種省徵調民間

風還業歲適有秋運麩十萬斤軍中以繼饗又送絮襖袴各二萬爲冬

備尋奉

命還鎮復得

旨交部議敘己丑春署甘肅提督是冬引疾歸時長子致蕃官刑曹公京居十年致蕃出守福甯調福州擢官江蘇常鎮通海兵備皆就養公頗身廣類爲人厚重坦易其論事言盡而氣益和尙信義一諾死生無變喜爲詩工書法嗜老子道德之旨觀物從容蕭然有以自樂癸卯冬仲書諭其子致昌大梁謂天寒不得遊金焦二山但看醫書遣日耳後數日病遂卒後二年致蕃等奉公葬於山陰謝墅官山嶼之陽配李夫人耐旣封宜有外碑之刻致蕃以屬儀吉不敢辭銘曰

大忠之門有濬靈源篤生偉人壹志誌宣曰惟忠孝厥本是溥服事

三朝其政蕩平入奉京輦出守邊鏈內清外謐祇

天子令眾處博愛功成不言茂德餘位施之後昆伯仲科第諸子皆彥

孫也代雋璧公不聞豐江云千巖碧嶂東溟其逝磐石長存

浙江定海鎮總兵龔公墓志銘

王顯芳

道光十有二年七月望日武顯將軍前浙江定海鎮總兵秋舫龔公以

疾卒於濟南明年三月其子廷煌以其喪歸奉狀乞銘曰此先將軍之

志也先是公以就養來東授余東隅錄一冊知公七載舟山嘉惠軍民

甚周歸老之日士庶歌詩成帙肖像建生祠每歲誕辰合樂育嬰堂尸

祝之余爲詩紀其事嗚呼古來擁大纛建旌麾者能均勞逸同甘苦得

軍士心斯已難矣若民生疾苦輒以文武分岐自謝甚或袒兵以病民

此大鎮駐節之地官民往往交病也嗚呼其可尙也已公諱鎮海字文

灤秋舫其號世爲江蘇華亭縣人曾祖諱伯榮祖諱維成父諱聖臣並

以公貴累

贈武顯將軍母夫人夏氏生二子公其長也生而英偉讀書不利補武

庠生亦不舉去而從軍守崑山葦葭汎嘉慶初海逆蔡牽與崇明鎮軍

相持小羊山絕我樵汲糧盡矣公奉檄濟師以小艇載米泊爽缺口晨

率舟師出上游蔡逆果移舟迎拒而下游小艇得徑度賊知失計遁去

以功擢泰州守備河決荷花塘淮揚下河災公倡率捐振治藥療疾全

活無算沿海捕魚小舟名閩頭杉板有竄入浙境爲盜者制府概令禁

毀公廉得千三百舟怒然曰一二爲匪奈何使千百家失業力請弛禁

調崇明水師守備歷奇營遊擊吳淞參將會京口副將缺員制府孫公

請以本省人補用得旨俞允蓋異數也旋晉定海總兵定海孤懸海外奸民不靖數十年矣

公親履轄境禁江南漁船入浙以絕侵越定救護遭風商船賞格以杜

搶奪分兵駐內外洋又雇商船伏精勇隨潮游奕連獲盜十數起洋面由此廓清

優旨嘉獎道光十年以足疾引歸公精計畫嚴約束身先士卒雖除夕猶坐樓船乘風破浪故人樂爲用而卒收成功生平嗜義若渴俸入不以自潤在定海久惠及軍士不具論倡修學宮置田五十餘畝爲多士省試費捐育嬰堂哺費製衣百稱濬城中市河復明堠洞使內外通流置朱家灣義冢爲軍民掩骼所施棺施藥歲以爲常邑人士咸泐石記之此東隅錄所由作也初贈公多女航海禱普陀祈子歸夢普陀僧而公生普陀山定海鎮所轄也贈公因以命名至是公持節爲鎮府而措注深入人心爲先後鎮府所罕見公常謂我於此土有前因定人亦謂與公有夙緣也諒哉生於乾隆二十三年五月二十九日春秋七十有五配夫人王氏先公二十年卒子男四人廷煥府學附生次卽廷煌增貢生歷署山東新城商河令次大鏞殤次廷棟先卒女二人孫男五人孫女二人曾孫男二人以某年月日啟王夫人殯合葬於袁葭鎮之原銘曰

公生本自普陀來公任方從普陀回普陀迎公歸紫府名與普陀同十

古我銘公阡詔來許

額勒精額傳荆州駐防志

續碑傳卷四十九

七

額勒精額字瑞亭滿洲鑲紅旗人善騎射補本防驍騎校值苗疆事亟募民內訶額從大軍轉戰數省以功擢協領在軍時領餉銀五萬例得羨餘數百金不以入己爲同行死事者治樁歸骨桑梓臚之晉京口副都統任滿遷松江提督以母老仍回京口凡十二年治軍寬嚴並濟營置洲田數千畝歲可獲租數千金士賴以飽立射圃義學俾防中子弟有肄業所厥後登鄉舉接踵僉以爲善政所致受

睿廟知最深鎮江知府某權貴璫也爲權貴通聲氣諷以納交笑曰某

年垂七十從未向私門奔走某銜之致書權貴會額入覲

上問江南疆吏額直言無諱稱

旨交樞臣記名權貴傳

旨謬以同時召對之某都統易之上怒曰額勒精額剛正人也爾何易之權貴慚謝卒予記名由是剛正名滿都下矣協領某與江甯將軍爲姻黨怙勢枉法按治不稍貸嘗自言人生當光明磊落使人稱大丈夫名節所關禍福且不問況區區祿

位平事母極婉順母喪還里江行遇大風他舟覆者無算額跪禱船頭竟無恙年七十三以病乞休至八十六始卒

前福建水師提督許公墓表

鄧銘辰

公姓許氏諱松年字蓉鶴浙江瑞安人也當乾隆嘉慶之交川楚姦民蔓熾海盜乘閒嘯聚蔡牽爲大宋潰次之挾岸奸結聯夷舶合數百艘擾浙閩粵三方海上凡數千里垂十數年而後破滅時語水師良將推壯烈伯李忠毅公長庚及忠毅所識拔裨將若公及王公得祿邱公良功等忠毅之擊牽潰公等嘗爲軍鋒臺灣之役公及王公別將洎忠毅戰歿訖滅潰者公滅牽者王公邱公三公後皆位提督繼李公任王邱並膺五等封而公亦以勲獎朱潰

特子孔雀翎世廕雲騎尉其後十餘年公任福建提督總督以事劾罷公家居一年旋卒後又十餘年英吉利寇中國浙閩粵三方駛擾殆徧時承平久水師積隳舟楫窳敗而公等部曲亦散亡略盡矣不獲已取征川楚時一二宿將臨之水陸不習輒無功或敗衄至誅死於是世乃歎公等當日衝厯風濤冒鋒鏑煙火搏死戰於洪波駭浪之中其事爲尤難又重歎公年壽之不永脫今猶在不過七十餘古名將垂暮樹

欽定四庫全書

古

功名多矣以公材留遺至於今日賊殆不足滅何文吏牽掣妍媚之患卽封侯賞豈足道哉公之卒也不得蒙易名之典其葬也誌石未具道光二十四年四月於是仁和邵懿辰始因其子錫麟之請爲文以列於外碑按年譜公貌魁偉異常人幼隨諸兄讀輒逃塾馳馬乃就武試年二十中武舉再會試不中入營效力以千總擢鎮海守備護參將時李忠毅公爲定海總兵統官軍勦牽等以公爲先鋒自是每戰必倚公度重洋追捕屢有禽斬先後獲賊目及舟船礮械無算嘉慶初擢定海遊擊李公擢提督公亦署玉環參將旋擢福建水師提標參將仍領北洋舟師始蔡牽踞閩洋朱潰踞粵不相攝未幾牽獲閩商巨艇劫臺灣米分餉潰遂與潰合連舸百餘入閩洋戕溫州總兵胡振聲復合犯浙海鋒銳甚時忠毅總統閩浙水師遇於扁礁洋二賊結爲橫陣公秉李公令分舟師爲兩翼左右擊而自帥銳師突貫其中賊不支遂大潰幾獲牽牽委敗於潰潰怒黨復分是時賊艘多倍我方戰公勇氣踴厲銃矢傷面不避李公大賞愛益內親公乃請公女妻其嗣子十年護金門總兵四月敗潰甲子洋六月擊青龍港當是時蔡牽數大創乃謀奪臺灣爲窟穴大舉賊眾盡載所掠財賄入臺灣樹旗稱王攻府城他賊萬人

別屯州仔尾沈舟塞鹿耳門以拒官兵之赴援者李公至不得入謀知
南汕北汕大港門可通小舟令公及澎湖副將王公乘彭船入攻之公
與王公議曰我師少難以力勝賊船巨而重誘使膠於淺且用火攻乃
可破也明年正月伏兵淺沙親挑戰賊果入伏中火敗之連戰皆捷二
月朔公夜率銳師跣海水登州仔尾焚其寮牽反救公與李公夾擊大
敗之明日復夾擊大敗之牽窮蹙將就禽忽鹿耳門潮漲颺所沈舟牽
得竄出公復與李公夾擊敗之是役也公爲軍鋒冠前後奪舟大小數
十焚寮及舟無算殺賊數萬橫尸數十里臺灣獲全威名振海上十二
年春及李公追牽至廣東沱滙外洋奮力衝擊頭面手足皆傷

詔褒美實授金門總兵其年冬李公戰沒於廣東黑水洋公聞憤甚明
年春追牽至粵洋及虎門鎮孫公全謀合力擊破牽所乘大船牽易他
舟遁入夷海十二月至長山尾洋追及朱濱大戰至夜濱百餘艘列陣
如長蛇最中一巨艦悍不可制度爲濱舟集力攻擊濱及懇黨皆礮斃
獨濱弟渥脫去明年官兵殲牽於北洋渥率其眾降於閩於是二巨寇
皆滅海洋謐清公亦傷疾發告歸尋丁母憂服除授甘肅西甯總兵未
至調陝西延綏又調福建漳州居漳州四年海上無事聞爲民興利去

續碑傳卷四十九

五

害甚得軍民心嘉慶二十二年英吉利兵船駛入內海謀狡異
廷議豫防乃增天津水師總兵以公宿將移任之居天津又四年夷艘
迄不至道光元年議裁撤調公廣東碣石鎮俄擢廣東陸路提督調福
建水師提督爲提督五年總督趙文恪公慎吟深相知愛言計悉聽從
代趙公者嘗與公不相能乃坐臺灣民械鬪公馳案不卽決爲遲誤軍
事并鎮協官劾之並落職尋格眾論請仍以都司遊擊起用而公已病
不能興矣公生於乾隆丁亥年閏月二十八日卒於道光丁亥年三月
二十二日葬以己丑年十一月十日曾祖寅祖宗衛父灝並

贈振威將軍母張氏

贈一品夫人娶胡氏子四人錫麒錫麟錫禎錫祥皆側室出墓在其縣

一都麗舉犁筆山之原

予告廣西提督蘇公傳

吳嘉賓

公姓蘇氏諱兆熊字涓占號磻溪江西鄱陽縣人三世皆以公貴顯
贈如其官妣皆一品夫人公少以諸生從行伍年二十一補南昌鎮標
外委超勇公海蘭察用師臺灣公迎於途超勇公與語奇之令從軍入
閩以親老不能行居十二年擢貴溪把總遏邪教倡亂者有功居九年

擢撫州營千總計獲巨寇引

見以守備用擢廣東南韶連鎮標右營守備移增城左營署佛山都司擢廣州協左營都司公年且六十矣

今上元年

命內外大臣密疏文武中賢能卓著者以

聞公遂超擢參將旋擢副將授潮州鎮總兵官廣西提督道光十二年壬辰正月湖南猺趙金隴爲亂距廣西之賀縣二十里邊民洶懼公聞卽馳往駐軍桂嶺獲猺之謀伺者曾晚任秀月等廣西以安嗣廣東連州猺復起公又移駐賀縣南鄉五月東師失利公往會師於連州奉

命兼署廣東提督六月敗賊於茂古洞又敗之虎又塘大鞏橋六戰皆捷提督余步雲至公歸賀縣防禦留兵會期廣東猺平卒得留兵之力公治軍嚴覈虛伍修窳械常如有事廣西兵久不習戰公至卽簡練軍實始教之爲擡礮迫征猺竟獲其用其在潮稍鉛缺額至數萬斤久不補公亟設法籌補足額然公性尤不嗜殺人任都司時獲眾爲誑詞敵血盟者四十八人密請於大府祇坐爲首者曰愚民坐無知至此實不敢苟殺人冀遷擢由是益受知於大府襄平蔣公賀縣猺盤均華乘公

續傳卷四十九

共

會師連州欲出境與楚猺合官軍獲之公歸則有告其故巢復謀變者公曰是烏敢擇謹厚者往視之果無事蓋公之用心不僅在於軍旅而已始爲偏裨嘗助有司盡心於民事初任貴溪汎邑人至立生祠事之撫州大饑民欲爲亂守令皆以事出公撫戢遂定又請設安仁鄧家埠縣丞及千總埠當五邑衝盜賊易藏奸議上大府以爲然遂得請佛山舊有深自張槎堡達通濟橋遠鎮市至文塔入江歲久淤塞公因土人言議開濬眾服且奮民居礙濶者三百家皆自毀以遷無齟齬者至潮州又與守道議濬海口之法會移廣西不果潮州人至今思公議云潮故死囚繫獄不肯就枉械有海陽令于君者思革其弊囚遂譴公立召兵圍獄牆脅使自出爲首者四人杖斃之囚懼聽命凡民間利害公不知則已知無不言於有司且爲之計與除謀久遠與文吏同心愛民嘗謂設兵以衛民也爲將者苟黨兵以擾民則亂首而已嗚呼公可謂能見其大者矣國家之法不使武臣與治民治之爲侵官如公者非有司所樂與其治哉其他武臣常職又烏足爲公道也公年七十以病乞休

得

旨予告歸歸二年而卒享年七十有二道光十五年也配許夫人先

公卒子二人孟暘進士改庶吉士官吏部主事仲鴻舉人公卒時有孫四人曾孫一人孟暘登賢書嘉賓同歲副榜故得讀公事爲之傳

王提督傳

姚瑩

浙江提督王公得祿字玉峰福建嘉義縣人世豐於財兄弟各五十萬乾隆末林爽文作亂以武舉集義民助官軍殺賊立功授水師營守備嘉慶中蔡牽縱橫海上數從李公長庚擊賊洊至澎湖協副將十一年蔡牽進鹿耳門結臺灣匪民數萬人圍臺灣府城爲陸營於洲仔尾大小船數百號自鹿耳門至府城下聯絡三十里蔡逆自擁大幫巨艦踞鹿耳門鑿民舟沈塞港道以絕援師時李公及金門澎湖舟師大集阻門外不得進使公以六百人駕小舟自安平港入偵之一望賊帆彌滿眾皆失色公多備火器至夜乘風焚之鼓噪大呼軍殊死戰賊舟延燒幾盡焚殺溺死無算公遂入屯柴頭港賊氣奪明日自洲仔尾攻府城北門官兵出戰爲賊所乘將退賊甚眾追擊公將六百人排槍齊進躡賊後大呼攻擊賊驚卻擾亂城內軍反夾攻之賊大敗潰進追至洲仔尾遂破其營蔡牽乃遁敎功進總兵明年李公追蔡牽中飛礮卒公爲提督總統閩粵浙三省舟師擊賊敗困之蔡牽窮蹙十四年追賊於黑

續神傳卷四十九

七

水洋首及賊乘夜轟擊蔡牽坐船高大急難攻公用火箭火罐齊發先焚其篷賊亂公自以戰艦直撞賊舟毀其柁樓蔡牽沈海死二十餘年巨寇遂平論功晉子爵世襲

賞雙眼花翎爲廈門水師提督十年遷浙江提督眾短之於巡撫遂乞

嚴學淦

病歸時年五十三公短小精悍善戰身先士卒故所在有功自滅蔡逆

威名益著其去也人皆惜之

紀桂提督平綏定叛兵事

嘉慶丙寅秋七月陝西甯陝鎮兵三百人叛以扣餉名殺鎮將官劫監

焚市肆翻城走破洋縣擄數千人

上命繼勇侯德楞額泰公統川楚及陝甘兵二萬討之九月十九日與賊

遇賊乞降德公姑許之奏聞

上怒謫公西安將軍統其眾而戍三百人於塞外十二月二十二日四

川綏定府綏靖營兵二百人叛亦以扣餉名劫監焚市肆翻城走無籍

奸民亦附之時四川川北太平協副將羅思舉川東夔州協副將桂涵

嘉慶二年以鄉兵應募勦白蓮教匪大小數百戰積功至今官陝兵叛

檄往受降還總督勒保公命各巡川東北邊二十四日桂公在梁山縣

聞綬定兵叛急檄本部兵往梁山一人一騎晝夜馳二十五日入綬定城酣臥竟日起移府縣曰餉二千移參將曰兵三百鄉兵一千白桿二千二十七日晨出兵殺賊知達縣余永甯請益兵桂公笑曰吾已集五百人在亭子鋪矣鋪達縣地賊東竄當其衝方聞信時桂公已命弟吉聚弟兄叔姪並素所習者爲一隊至城內不知也時賊在景市廟距達縣四十里探將往九十里地麻柳場師期桂公下令曰急趨景市廟先策馬進兵繼之不數里忽馬首聞道曰急趨麻柳場兵改道及賊數里外又令曰止肅隊整戈毋譁及賊又令曰入深箐持刀矛相向鼓弓矢勿發前隊視賊多寡急以報場山四圍賊走嶺上不見官兵至呼噪揚旌旗塵沙蔽空而奔前隊復命曰甚囂將千餘人桂公怒曰咄出綬定城甫五日狂擄亦不若是眾敢言賊多者斬俄前隊復報曰賊下嶺逼近矣請張蓋鼓哨進桂公怒急蹴蓋曰伏毋輕進敢言桂涵至者斬賊猝遇官兵亦屹立賊首奮大旗周揮而呼曰後隊作前隊急登山賊蟻擁上旗賊復大呼曰吾本營兵耶太平兵耶夔州兵耶領兵官誰某耶官兵寂無聲賊再呼寂如故賊怒率勁騎下壓官兵仍寂然三壓三退羣錯愕相顧不復前忽官兵數百長稍突起人拍首瞑目雷叱直搏仰

續傳卷四十九

六

攻賊倉猝不復能軍猶力距旣而誦曰官兵後至矣桂公弟吉已率五百人踞山頂賊大潰兵合圍之盡就縛五日叛兵平總督勒保公馳奏上大悅加桂公總兵銜

賞巴圖魯將弁論功有差師還府縣錫桂公於庭而賀之問胡勿檄本部兵曰防賊東也胡用綬定兵曰示不疑也胡鄉兵喜殺賊曰吾言賊擄民財多急取諸且餉與軍並進也胡甫發卽改道曰聲言尾追賊不虞吾截擊也胡潛伏不急擊曰仰攻不易俟其懈可取也胡三壓三退曰吾伏箐林賊不知吾虛實也胡禁言賊多曰懼亂軍心也胡匿姓名曰賊耳吾必伏擗涕泗乞降稍懈恐有他變也方桂公平賊時羅公自太平一日夜馳六百里至恨不同殺賊義憤見於色屢以指彈佩刀鏗然作聲闖丁卯正月十一日復有陝西西鄉瓦石坪叛兵一事

初陝西固原提督楊公遇春同將軍德楞泰公受叛兵降後瓦石坪兵復叛拔隊西竄亦數百人入四川太平廳境羅公馳赴過賊拔刀先登刃十數賊眾亦爭進賊猝不及禦呼曰吾乞降羅公曰吾知殺賊耳不知降揮刀進益力賊不能支返奔遇陝西副將祝廷彪招與語未畢而羅刃剽於臂者又十數計鋒及祝幾傷祝跳而呼曰吾某也始免楊公

亦至賊痛哭伏地楊公盡斬之
事聞上亦賞功如桂涵將弁以下同

方綬定之兵變也予在城中事定得見桂羅二公皆黝腊短小睛凹眶黑光炯炯射人臨敵制勝有古名將風殆天授也是役也藍翎馬兵羅貴隨桂公擊賊與賊首孔傳仕遇相迫孔挾長矛二刺羅股入肉穿血如注羅色自若奮戈直前透孔肩膊胸腹以下十數創眾爭禽之孔至死不卻走貴羅公猶子也

上特恩賞巴圖魯以守備用羅公指一外委語予曰是名曹化成嘗隨擊賊刀入腹腸出寸許不暇帛裹以指塞創更戰賊驚走解衣示予肉縷縷攢結全起一峯如拳大云

湖北提督羅思舉傳

願復初

羅思舉字天鵬又字子江東鄉人也先世本楚孝感人始祖孟宗於明洪武時遷蜀至思舉十七世祖璿父文才家故饒裕以好施濟遂中落生思舉等兄弟八人思舉有膽略躡捷架黠能踰數仞之牆往來如飛既貧困又遭歲歉無以為生乃習為椎埋堅利事與雞鳴狗盜伍亡命秦豫兩楚閒結交得三十六人借軀報仇手殺不義之徒先後數輩屢

續傳卷四十九

九

遭奇厄及刑獄適有天幸得不死十七歲時遇一道士引之至終南山中授以陣法及擊刺之術二年盡其技又能周知山川阨塞民俗情偽閭巷鄙瑣凡碎事雖不羈性特好義趨人之急若不及見不平事尤切齒默自念流宕非計大丈夫當成名天下而未有會也嘉慶元年川楚之間教匪四起龍紹周起於耗子孺孫世鳳起於五朵雲龔健起於沖天觀苟朝元起於巴州羅其清起於方山坪王三槐起於豐城徐天福起於達州丁世龍起於鄖陽林亮功起於大昌陳從得起於大甯所在哨聚紛若蝟毛黎民奔駭

朝廷震怒

命大臣四出討捕思舉時年三十二矣以事避終南山中遇前道士教之出乃發書五百函招前所結交三十六人及諸子弟願從者率之至川焦壩聞其叔崇率團與賊戰敗思舉適至時王三槐眾二萬餘掠鳳凰寨崇令思舉往探眾約賊多以手後指即退賊少則前指眾因進思舉上山望見賊眾顧念後退非計以手前指義勇隨之見賊愕立思舉奮身大呼而前眾因乘之賊大潰奔逃所獲無算潼綿營遊擊羅定國聞其能錄用思舉十一月王三槐踞東鄉之豐城眾莫敢擊定國募能

破豐城者思舉應募與三十六人往未至三十里皆懼不敢進思舉乃回營請火藥廿數斤乘夜獨往凡越賊堡三十六重至其巢穴窺見賊眾四邏燒號火明如晝乃伏匿暗中俟之繼而鼙聲訥訥然眾皆熟睡思舉乃下取火進至草屋中掘地爲三坎納藥其中安置引綫以火然之遂逸路見羣馬無鞍騰身跨其一餘馬皆隨之絕馳引綫盡火藥發轟聲如雷連衡比棟盡皆延燒火光燭天十餘萬賊驚起逃竄山崩地塌人馬沸騰互相蹂躪墜崖死者不可勝數思舉乘火光燭天行至絕壁處不能下乃棄馬獨跳耳中聞風聲隆隆然如在夢中歸報定國明日至其處檢視計斃賊數萬人餘賊竄雞爪嶺思舉由是名聲冠蜀中賞行營七品頂戴諸將皆欲得思舉者從都統佛住索音布七十五丙大臣德楞泰將軍明亮等先後禽斬賊廖廷賢於峰塵林天元於江油張世龍張世虎於通江陳天奇於奉節王三槐於開縣張簡於陳家坪唐明萬於石柱王士貴於太平羅其清於雞爪嶺孫老五於觀音山皆巨魁也思舉善能出奇制勝神變不測枯木朽株盡得其用累於危急束手時得思舉至出一策卽立勝又往往溷跡賊中口誦賊所謂靈文賊不之疑而思舉輒得其要領以故所向有功每戰匹馬獨先無能

續神傳卷四十九

字

枝梧者先以鄉勇效命諸將上功輒云官軍而不列其名後爲索音布七十五所奏始授營職

賞蘇爾方阿巴圖魯勇號累遷至夔州協右營千總嘉慶十年事平授

太平協副將十一年新兵叛十二年陝西兵變思舉皆討平之加總兵

銜旋授甘肅涼州鎮總兵調重慶鎮總兵二十年瞻對叛奉檄進討斬

其酋洛布七力餘皆歸順歷授貴州雲南四川湖北提督道光十二年

湖南搖趙金籠謀逆

旨命思舉進剿三月平之

賜雙眼花翎輕車都尉世職

仁廟時入覲

上問何省兵最精思舉以將良則兵自精對稱

旨

宣廟時入覲

上問賞罰何由明思舉以進一步卽賞退一步卽誅對稱

賞內府珍玩

賜宴便殿思舉生平功績多在微時其所設施人咸樂道之及爲鎮將馬足所至民皆壺漿以迎市廛交易不變瞻對之役夷地險阻負固抗拒聞思舉至眾皆羅拜縛其酋降趙金龍之亂楚南震動思舉以計破其堅壁進攻時令其旗牌與總督盧坤約曰翌日天明出兵總督諾之旣而又一旗牌至曰三更拔隊又諾之旣而又一旗牌至曰今日酉刻進兵請卽發總督統兵往比至而思舉已凱旋矣總督諾之思舉曰此兵機也公營有賊聞信卽報若遲則賊已預備不可攻矣時

上方慮其軍單不能奏功

命將軍禧恩佐其軍軍至中途而捷書已至其神勇類如此思舉未應募時先徙其父母於陝西之高橋留資令兄弟奉之而獨與三十六人至蜀先後皆建有功名然思舉獨著幼時嘗從李先生讀書不成旣貴則興造書院修置義學與人談忠義事眉飛色舞嘗酒酣袒衣示人金創鱗比之外爲其母刲股者七焉嗚呼思舉蓋忠孝人也以道光二十

年卒於提督任

賜諡壯勇晉贈太子太保

諭賜祭葬

續碑傳卷四十九

三

國史立傳嘗自輯其生平事跡爲二卷纖悉甚備其微時所爲亦不諱

予特著其大者

羅天鵬傳

姚瑩

湖北提督羅思舉字天鵬四川東鄉縣人少亡賴數行竊令捕之杖斃棄諸野中夜而蘇匍匐至老嫗家周之遂改行娶妻忽患奇疾百方不治一道人過門曰有方可救但得錢三千乃能配藥羅自念貧窶安得三千錢乃語妻曰吾病且死若亦餓死耳若苟鬻身可得三千錢買藥則兩活矣妻不可強之再三泣而從之鬻於某氏得資治藥病果瘳白蓮教亂起投身軍營每戰爲前鋒驍勇絕倫歷功至湖北提督世襲輕車都尉其初貴爲游擊時遣人訪其妻重金贖之爲夫婦如初以報其鬻身救夫之義也道光十三年湖南永州苗趙金龍作亂羅受命與總督盧公坤往平之賊已因將禽矣時

上以尙書宗室禧恩爲大臣督軍未至諸公議待禧至羅曰圃久師愈賊必遁不聽遂一戰殲賊且盡禧爲內親信大臣督撫以下皆降屈爲禮怒其不待盛氣陵之羅獨不屈且面折之曰諸公貴人多顧忌羅思舉一亡賴耳受

國厚恩至提督惟以死報不知其他禱甚怒而無如之何羅每與人言生平作賊事不少諱嘗使人歷敘其事亦奇男子也

廣東陸路提督瑚爾察圖巴圖魯曾勤勇公行狀王摺

曾祖自秀贈昭武都尉廣西義甯協都司晉贈建威將軍廣東陸路提督

祖子於授昭武都尉廣西義甯協都司晉贈建威將軍廣東陸路提督

父謙贈建威將軍廣東陸路提督

公諱勝字誠齋廣西柳州府馬平縣人父謙以厚德聞於鄉善醫及形家言嘗爲人療疾遺金帛弗受日爾足重岡疊阜中往往擇穴地隱識之祕不語人人以是迂之公年十九棄學入伍乾隆六十年從征湖南攻克高多寨禽逆苗吳半生明年五月克火麻營以功補提標額外委把總九月由都魯溪進克黃土坡奪石卡木城六斬級三百功超等補義甯協右營外委千總十月克平隴賊巢進克馬頭山陰錦坡奪卡二十斬級五十獲六百餘人

賞戴藍翎十二月圍石龍寨手梟逆渠石柳磴生禽石老喬功超等嘉

續傳卷四十九

至

慶二年二月檄調川湖陝軍營協勦教匪覃加耀林之華等三月攻克四方台傳刀嶺連下九卡殲賊數十四月賊方竄官軍截勦於雙古木五月克軍家灣黃花坡乘勝直抵大荒口戰於燕子巖殲賊二千賊大潰餘眾據王家埡官軍圍之賊渠林之華率眾突出公尾之至雪厓生禽賊目七林之華中槍死十二月搜勦賊眾於朱里寨賊槍中公手創甚欽差威勇侯額勒登保飭回本營列頭等功五年補提標右營把總領補額兵赴湖北營隨將軍明善攻破羅漢卡賊六年補東蘭營千總七年擢隆林營守備遷梧州協都司八年五月湖北小九湖賊竄左家山隨總兵李天林率師進攻六月賊自界嶺入川投巫山西竄公率眾躡其後與參將虎正林會截之賊平九月率廣西兵凱旋十月調燹燹營都司十九年擢隆林營遊擊兵部引見

賞換花翎道光二年軍政卓異七年擢雲南城守營參將十年擢維西協副將十二年擢永州鎮總兵猺民趙金龍叛五月偕提督羅思舉等會剿焚其巢尋廣東小冲猺亂趙子青糾黨竄湖南江華縣境欽差大臣禧恩瑚松額檄公率兵勦克之七月連山猺大亂兩廣總督檄公率親兵充翼長公至率都司郭宏升等出兵勦賊於大拱橋分水嶺礮臺

山火燒坪軍寮里大厓冲上坻園等十九冲搖匪窮蹙乞降總督盧坤
上其功得

旨下部議敘

賞尙方珍綺有差是役也公功最

上特嘉其勇加提督銜瑚爾察圖巴圖魯名號雲騎尉世職尋調廣東
南韶連鎮總兵子承禧亦以功

賞戴藍翎以縣丞歸部銓用十三年廣東陸路提督員缺

特擢公踰年卒於官公狀魁梧能彎十二石弓廉傑剽悍負計略方以
步卒從征湖南高寨之役始陣執旗先登賊槍洞公左臂血流殷袴褶
弗稍卻賊驚爲神凡檄調聞賊所在如赴私仇故所向有功補雲南參
將時雲鹽引塞川私充斥州縣梟勢兇橫莫敢攖公請於制府檄行廉
其實滋事之日募壯佼給日食令有能死一梟者犒錢三萬獲馬畜自
入聞募者牘至徐黑二者號二王雲南梟渠也徒黨數千踞雷益馬龍
二州尤莫敢向之者公任曲尋獨騎率從者數人一日夜抵所轄平彝
縣與雷益鄰召汎官揀老卒二授以多金命之日徐黑二方食於落木
圩爾持此往與之博則迅使爾來告也甫人定告者至公疾馳縛之

續神傳卷四十九

五

天明入縣城以黑二與縣令驗之實人皆神之自是梟乃日斂先是小
梁山賊聚眾劫掠官吏匿其鋒者數十年矣或請制府以官軍剿之公
不可曰以官軍往非滋爲巨患則賊眾颺去耳獨請署雷營參將事
小梁山者黎山也屬宣城參將駐焉公往則日出騎遊獵山下漸與其
眾狎乃始伏兵誘執賊渠而烈其山焚之其當事任奇敢往類如此洋
泉岡之役提督羅思舉等圍賊數日公至曰亟以火眾然之事竣而欽
差大臣至將以疑其速也粵搖趙子青突挾數千眾踰江華將爲趙金
瓏援兩使者乃檄公往剿之剋以旬日公往七日而殲賊千趙子青就
禽乃出兵按捕餘賊於四山閒而廣東排搖猖甚兩廣總督盧坤星檄
公赴連州公召麾兵未集乃屬兵於部將而手提三百卒行比至連大
拱橋遊擊鳳靈適以賊圍急來請救公立往或難之故緩其軍芻糧使
不得行公號其眾拔隊疾馳距鳳靈營十餘里乃率兵入叢箐間道以
出賊背突擊之賊眾驚奔山梁圍遂解鳳靈等合軍賀公曰未也獨布
令肅眾以待夜定賊果復出前後山梁麾將郭宏升等伏並發賊大驚
方反奔而搖排左右忽火光騰天煙燄四塞是夕羣搖號聲震湖谷相
踐踏死者以千計及明而洋泉搜山兵至遂攻內五排等十九冲乘勝

掩撲禽戮無算逆裔哀懼乞降越日欽差大臣禧恩等復自湖南至乃與提督余步雲等搜剿西路冷水各小沖受裔民降蓋公始至獲勝之機實以三百卒也公忠亮敢爲而性傲特大拱橋之裔已出降而欽使後至或希意擬公以勝仗報公厲色曰吾能打真仗不能爲僞仗也及所向事卒辦欽使乃不忌之而修好焉而公亦樂輸力以效任廣東提督時嘗出兵禽煖航山賊劉花面胡短手等遊擊劉際清以陷賊逸歸被劾而公亦以議奪級時天下查禁煙土之令嚴公以粵匪恆藉是滋擾倡議變法以澹其禍請於制府奏之不果踰年英吉利夷目律勞畢果以兵船突破內河礮臺水師兵棄險反走公告制府請囚洋行與夷目通互市者而絕其食飲以數十艘艦載巨石沈海口隘道中然後以草船數百橫內河計燒之夷船將不戰自慄令行公率兵獨駐大河之中流沙律勞畢果悚息乞哀由小河遁澳門一夕死然船石實未集公爲人言之尤以爲憤也公之卒

上聞奏悼惋以提督例加卹

賜祭葬諡曰勤勇先世有隱德祖子於起家行閒及公之身恢其先緒出入戎旅大小歷數十戰以功名終嘻其盛哉公旣卒子承禧走京師

以公歷官行事來告曰願有所述用爲撰錄如右謹狀

浙江提督毅齋祝公墓志銘

李樞

道光二十二年九月二日原任浙江提督毅齋祝公以疾卒於成都卜以二十三年四月十二日葬於雙流縣郭之南原其孤昌奎奉行狀來乞銘按狀公諱廷彪字虎臣號毅齋先世湖北麻城縣人明初入川占籍爽江曾祖考諱仲文始遷雙流祖考諱欽命考諱萬安三代俱贈振威將軍如公公偶儻有遠略年十九卽應募入伍乾隆五十五年從征廓爾喀以功授額外外委五十九年從征黔苗以功授懋功營經制外委

賞戴藍翎嘉慶元年苗疆凱撤而白蓮教之亂作教匪孽於湖北蔓於川陝自襄鄖以內巴渝以外延袤數千里深山邃谷盡爲賊巢蜂屯蟻聚旋撲旋起合之不下數十萬人分之亦各數萬其中自爲頭目若湖北之覃加耀張正朝陝西之王廷詔王國用王士虎四川之冷天祿羅其清苟文明皆渠魁也公馳驅於三省之閒前後生禽賊渠十二殲斃者六十餘賊之受降者無算嘉慶五年

賞戴花翎七年浚升甘肅提標中軍參將是時大難雖平而餘孽未淨

十一年七月甯陝兵變兵故賊之乞降而分隸於各鎮者公於四月擢漢中城守營副將七月甫至漢中聞變卽馳赴南山沿途截勦至十月而事定十二年正月復有瓦石坪之變公於陽平禽首逆周士貴等五人並其黨一百餘人

睿皇帝嘉公迅勇

錫公迅勇巴圖魯名號

賞銀一百兩十四年擢甯夏鎮總兵特調陝安鎮總兵十八年禽岐山

賊尹朝貴

賞四喜玉搬指一箇玉翎管一枝玉櫛小刀一具黃瓣大荷包一對小荷包一對是年河北賊李文成牛亮臣據滑縣大兵雲集公獨未與蓋

睿皇帝以陝安不可無公故也

諭令入覲

獎勞備至

今上卽位

賞公頭等待衛大門上行走謂陝安非公不可道光四年仍以公鎮焉十四年轉貴州提督十八年調浙江提督十九年英夷內犯二十年六

續碑傳卷四十九

五

月夷船駛入定海縣陷其城公馳赴招寶山圖攻取目不交睫者六十餘日

上以公身經百戰年踰七旬思所以安全而休息之

諭令致仕公遵

旨於二十一年回籍踰年而公卒公素未學書剖機應敵往往暗與古合而其果敢尤絕人自入伍以後每戰必以身先雖矢石如雨屹不爲動初攻苗時數被礮傷其丸深入左額剔之出其入右股者未出也在甯陝爲賊所偏予逗於顛墜深溝中踣不能起血涔涔潰胸臆裂戰袍裏其創計其創去咽喉一指耳人以是服公之勇賊之乞降而分隸於各鎮者率皆桀驁難馴反側無定而公麾下所錄數百人究帖然不變兼能得其死力人又以是服公之智且服公之誠任湖南提督者七年復任陝安總兵者十年時海寓清謐四陲息警然所莅之處修明武備未嘗少衰其自浙歸也猶以定海未復爲恨嗚呼公之遺憾在是而公平生忠盡之忱亦於是乎可見矣公生於乾隆三十五年九月一日享年七十有三元配徐夫人繼配余夫人帥夫人子男四人長昌奎蔭生兵部候補主事次崧奎理番廳增生次昭奎監生次耀奎孫男四人玉

祿玉福玉堂玉佩銘曰
功成身退古所難受之歸之惟其全三樊舊地新墓田高松大柏盈長
阡福子孫兮世縣縣

續碑傳集卷四十九

續碑傳集卷四十九

美

